

Revelesen Nægkiariien sə rani mə nəfe i nəkukuə

Jon in aposol riti səvəi Iesu Kristo. Nəp̄in kinərhi irapw in revən fwe tənə əmweris riti nəghin nə Patmos nənə m̄irai nəkukuə i Revelesen. Jon rokeikei mə truvehi utə nətərigien səvəi nakalasia me səməme kamo nəm̄isəien m̄inraha ti nahatətəien səvənraha ia Iesu Kristo. Jon rokeikei mə nakalasia me tuhəukurən mə Kumwesən ramərimənu ia nəfe kamo ia t̄iprənə i. Ia nəkukuə i Nən̄imw̄in raməgkiari mamō səukurən mə Iesu Kristo in Iərimənu. In ramərimənu ia nərmama me pam m̄ine narimnari me pam, mamərimənu mwi ia nərmama səməme haməuvehi n̄iskaiien asori ia t̄iprənə i. Kumwesən trərpw̄in noien ərəha me səvəi nərmama m̄ine Setan ia kwopun napw rauək ikin. Kumwesən tro n̄itətə sə in ramərimənu irə trier irapw. In tro mwi neiai vi riti m̄ine t̄iprənə vi riti.

Nægkiariien sə rakupwən

¹ *Nəkukuə i raməgkiari ia nari m nari me səməme Iesu Kristo r̄ino pui. Kumwesən riməuvei pen narimnari me i min mə in trahatən səvənhi iotukwininari me irə pwəh irəha hətoni mhəukurən narimnari me nəha r̄ipko mhə tui tuhaməkeikei mhəier pehe. Iesu rərhi pen agelo səvənhi revən

* **1:1:** Dan 2:28-29, Rev 1:19, 22:6

məvisau pen narimnari me i m səvənhi iotukwini-nari riti nəghin nə Jon. ² Jon nə rirai pen ia nəkukuə i narimnari me pam sə in rinətoni. In i nəgkiariien səvəi Kumwesən mine nəgkiariien sə Iesu Kristo rini mə ro nɪpərhiēnien. ³ *Pwəh Kumwesən rəkwein amasan ia iərmama sə trəvsini irapw nəgkiariien me ia nəkukuə i. Pwəh in rəkwein amasan mwi ia səməme tuhəregi mhesi pen nəfe kımərai pen ia nəkukuə i. Iakani iamınhi irə ti nəri nə mə nəpın sə narimnari me i tuhəier pehe irə ruvəuvehe ipaka.

Jon rirai nəkukuə i revən ti nakalasia me ia taon me nəha sefen ia profens Esia

⁴ *Iou Jon iakamrai nəkukuə i rauvehe tuku-miaha nakalasia me ia taon me nəha sefen ia profens Esia. Iakəfwaki mə Kumwesən sə rinərə fwe kupwən, marə ipwet mine, mamevən meste trɪpkıwən mhə, in truvei pehe namasanien mine nəmərinuien m kımiaha. Iakəfwaki mə nənimwın me nəha sefen kupwən ia jea sə in raməkure irə mamərimənu, ⁵ *mine Iesu Kristo irəha mwi tuho iamınhi irə. Iesu Kristo in iərmama i rıməni irapw nəfe in rinətoni miregi nərmama həukurən nətigiteien ia nəgkiariien səvənhi. In iərmama i rıməkupwən mətui ia nərmama me səməme həuvamhə. In iərmama i ramərimənu ia kig me səvəi tıprənə i. In ramokeikei kitaha, muvi niten meivinari ia kitaha irə mə noien ərəha me səkitaha ko həpkəkwtəmhiri mhə mwi kitaha. ⁶ *In ro

* **1:3:** Rev 22:7,10 * **1:4:** Eks 3:14-15, Rev 1:8, 3:1, Rev 4:5,8, 5:6, Rev 11:17, 16:5, Aes 11:2 * **1:5:** Jon 18:37, Kol 1:18, Sam 89:27, Rev 3:14, 17:14, 1Jon 1:7, 4:10 * **1:6:** 1Tes 2:5,9, Rev 5:10, 20:6

kitaha sēmwhen ia kig me mine pris me ia nəmri
Tata Kumwesən səvənhi. Pwəh nasorijen mine
nərimənuien krauevən tukwe in ia nuk nuk me.
Ouəh pwəh ro iamīnhi.

⁷*Hətə ro. In rauvehe ia reri nəpuə me.

Nərmama me pam tuhətoni in ia
nənimenraha.

Irəha sēməme hənəpi in ia nitei,

mine nərmama ia kwənəkwus me pam ia

təkure tīprənə i tuhətoni,

rerinraha rəpou hasək tukwe.

Ouəh pwəh ro iamīnhi.

⁸*Kumwesən səkitaha rani iamīnhi irə mə, “Iou i
Alfa mine Omeka.^a Iakinərə fwe kupwən, marə ip-
wet mine, mamevən meste tapkiwən mhə. Iakau-
vehi niskaiien me pam.”

Jon rətoni Iəmāti Iərmama

⁹*Iou Jon piəvmiaha riti. Kitaha miou samarə
pəri ia nəkwai nitətə Iesu ramərimənu irə.
Iakamərer əknekīn kitaha m kimiaha ia nəmisəien
me sēməme kamo m kitaha ti nəghin. Nəpīn
riti fwe kupwən kəmri pen iou iakarə ia tənə
əmweris riti nəghin nə Patmos.^b Irəha həmri
pen iou fwe ikīn ti nəri nə mə iakaməvisau irapw
nəgkiariien səvəi Kumwesən mine nəgkiariien
sə Iesu rini mə ro nīpərhienien. ¹⁰ Ia nəpīn səvəi

* **1:7:** Mat 24:30, Jon 19:34-37 * **1:8:** Rev 1:4, 15:3, Rev 21:6,
22:13 ^a **1:8:** Alfa in leta sə rukupwən ia alfapet səvəi nəkur
Kris. Omeka in leta sampam. Nahag i kaməkwein Kumwesən irə
nīpwran mə in nukunen mine nəkrəkwerin. Əvsini mwī Rev 21:6,
22:13. * **1:9:** Rev 6:9 ^b **1:9:** Patmos in tənə əmweris riti
kəmri pen Jon fwe ikīn rəmwhen mə in ramarə ia kalapus.

Iærīmānu səkītaha iakətoni vison riti Nənimwīn rəriari miou. Ia vison nəha iakregi iərmama riti raməgkiari ia təkutak rerin rasori rəmwhen ia kisipw, ¹¹ mīni mə, “Rai pen ia nəkukuə nəfe ikamətoni, nənə mərhi pen nəkukuə nəha revən ti nakalasia me səməme kamharə ia taon me nəha sefen. Nəghi taon me nəha Efesas mīne Smāna mīne Pekamam mīne Tuatira mīne Satis mīne Filatelfia mīne Laotisia.”

¹² Iakuvsiini iou mə takətoni mə sin nəha raməgkiari pehe miou. Nəpin ikuvsini iou mətōni nəri laet raməkure utə irə irəha pam sefen kīno ia kol. ¹³ *Ia kurkwanraha iərmama riti rəmwhen ia iəməti iərmama riti. Tinari səvənhi rəpwəmwis. Rəkwanī nari kīno ia kol rukurau ia kwənpwenhin. ¹⁴ *Nīmwai nukwənen rəpsan rəmwhen ia nīmwheri sipsip. Rəpsan pik rəmwhen ia nisəkwai təsi.^C Nənimen mi krouəmwhen ia nərāmi napw. ¹⁵ Nisun mi krauser rouəmwhen ia aean nəha prons sə kuvani ia napw mə sə rərəha traiu raka. Rerīn rəmwhen ia nui asori sə ramivə mamierig. ¹⁶ *In rauvehi kəməhau me sefen ia rəgin mwatuk. Nau səvəi naruagənien rəhiə ia nīkaren mi ruku pen ia nīpəgi nəkwān mier. Nənimen rəmwhen ia meri sə raməhiapw ia rukwəsikər.

¹⁷ Nəpin iakətoni iəmə nəha iakmwei irapw ia nisun mi rəmwhen iakemhə. Mətə in rəmri pehe rəgin mwatuk ia nirak, mīni mə, “Tikəpwəh nehekīrien. Iou iərmama i iakīnarə raka kupwən,

* **1:13:** Dan 7:13, 10:5 * **1:14:** Dan 7:9, 10:6, Rev 2:18, 19:12, Rev 14:2 ^C **1:14:** Nəgkiariien səvəi nəkur Kris ramīni iamīnhi irə mīnuə “Rəpsan pik rəmwhen ia sno.” * **1:16:** Hip 4:12, Rev 1:20, Rev 2:12,16, Rev 19:15,21

nənə takarə mwi kurirə. ¹⁸ *Iou iərmama i iakamiru. Fwe kupwən iakimamhə, mətə ətə ro təkwtəkwuni iakuvəmiru takimiru ia nuk nuk me. Iou iakasori ia Noien Iərmama Remhə, masori mwi ia Imwei Nəkur Həuvamhə.^d

¹⁹ *Ro pen tikaməkeikei mirai pen ia nəkukuə narimnari me i ikamətoni, səməme kamo ipwet mine, mine səməme tuhəuvehe kurirə. ²⁰ *Takini pehe tukw ik i nipwrai kəməhau me i irəha pam sefen ikamətə ia rəgik mwatuk mine nipwrai nəri laet raməkure utə irə irəha pam sefen kino ia kol. Kəməhau me nəha sefen irəha nəha nagelo me səvəi nakalasia me səməme kamharə ia taon me nəha sefen. Nənə nəri laet raməkure utə irə irəha pam sefen kino ia kol irəha nəha nakalasia me səməme kamharə ia taon me nəha sefen.”

2

Nəgkiariien ramevən ti nakalasia me fwe Efesas

¹ * “Rai nəkukuə riti revən ti agelo səvəi nakalasia me ia taon nəha Efesas, mīni pen minuə:

Nəgkiariien i səvəi iərmama sə rauvehi kəməhau sefen ia rəgin mwatuk, nənə, mamavən ia kurkwai nəri laet raməkure utə irə irəha pam sefen kino ia kol. ² *Iou iakukurən noien me səkimiaha. Iakukurən mə hiaməmwur pik mamhərer əknekin ia nəpin me. Iakukurən mə hiamərapinhə ia nəkur

* **1:18:** Aes 44:6, 48:12, Rev 2:8, 22:13 ^d **1:18:** Nəgkiariien səvəi nəkur Kris ramini iamini irə minuə “Iou iakauvehi ki me səvəi Noien Iərmama Remhə mine Imwei Nəkur Həuvamhə.” * **1:19:**

Rev 1:1 * **1:20:** Rev 1:16, 2:1, Rev 3:1 * **2:1:** Rev 1:16,20

* **2:2:** Rev 2:19, Rev 3:1,8,15, 1Jon 4:1

ərəha. Hiənəkiri noien səvəi nərmama me nəha kamhəni mə irəha aposol me mətə rīpkō mhə irəha pərhiēn, nənə, hiənətoni raka mə irəha kamheikuə. ³ Iakukurən mə ia nəpīn me kamo nəmisiēn m kimiaha ti nəghik, mətə hiamərer əknekīn ia nahatətəien səkimiāha mhəpwəh nəpouien.

⁴ Mətə nari riti nəha ikīn hiamō rīpkatukwatukw mhə ia nənimek. Kimiaha hiənəpwəh nokeikeiēn kupwən səkimiāha.

⁵ *Ro iamīnhi irə rerimiāha tramrhi nərəriēn sə hiənərer irə fwe kupwən kurirə hiəmwei. Tihərərīg ia noien ərəha me səkimiāha, mho narimnari me nəha sə hiənamō fwe kupwən. Trīni mīnuə hiəpwəh nīrərīgīēn ia noien ərəha me səkimiāha, nənə takuvehe tukumiāha muvehi raka səkimiāha nəri laet raməkure utə irə ia təmwhēkīn. ⁶ *Mətə nari kuatia nəha ikīn hiamō rāmasan. Kimiaha hiəmwəki noien me nəha nərmama səvəi Nikolas kamhō rəmwhēn iou mwi iakəmwəki.

⁷ *Iərmama sə nəkwəregīn rarə traməkeikei mətərīg amasan ia nəgkiariēn me səməme Nənīmwin Ikinan rani pen ti nakalasia me. Iərmama sə triskai meste naruagəniēn rukurau, iou takəsēni in rəni nukwai nei kauvehi nīmīruēn irə ramərer ia kwopun nəha Parataes səvəi Kumwesən.”

Nəgkiariēn ramevən ti nakalasia me fwe Smāna

⁸ *“Rai nəkukuə riti revən ti agelo səvəi nakalasia me ia taon nəha Smāna, mīni pen mīnuə:

* **2:5:** Rev 2:16,22, Rev 3:3,19 * **2:6:** Sam 139:21 * **2:7:** Jen 2:9, Rev 22:2,14,19 * **2:8:** Rev 1:17

Nægkiariien i səvəi iərmama sə rɪnarə raka kupwən, nənə trarə mwi kurirə. In remhə mətui mwi. ⁹ *Iou iakukurən nəmisəien səkimiaha. Iakukurən mə səkimiaha nautə riwən. (Mətə ia nənimək nautə səkimiaha rasori anan.) Iakukurən nəgkiariien ərəha me nəha nərmama nepwɪn kamhəni ia kimiaha. Irəha kamhəni mə irəha nəkur Isrel, mətə rekəm. Nounsəsimwɪnien səvənraha səvəi Setan. ¹⁰ *Tihəpwəh nehekiriien nəmisəien i tripkə mhə tui reste kimiaha. Həregi ro. Setan tripkosə pen kimiaha nepwɪn ia kalapus mə tro mətə sas ia nahatətəien səkimiaha. Tihəregi nəmisəien ia nəpɪn me i irəha pam ten. Kimiaha tihaməkeikei mhərer əknekɪn nəri auər a trɪni mɪnuə kousi əpune kimiaha, nənə iou takuvei pehe nɪmɪruien m kimiaha rəmwhen kəfəfau pen kəfəfau amasan ia kənkəpwə iərmama sə rəvtənhi nərmama ia naiuien.

¹¹ *Iərmama sə nəkwəregɪn rarə traməkeikei mətərig amasan ia nəgkiariien me səməme Nənimwɪn Ikinan rani pen tɪ nakalasia me. Iərmama sə triskai meste naruaɡəniien rukurau in trəpwəh nemhəien ia nemhəien sə ro kəru irə.”

Nəgkiariien ramevən tɪ nakalasia me fwe Pekamam

¹² *“Rai nəkukuə riti revən tɪ agelo səvəi nakalasia me ia taon nəha Pekamam, mɪni pen mɪnuə:

* **2:9:** 2Kor 11:14-15, Jem 2:5, Rev 3:9 * **2:10:** Mat 10:28, 2Tim 4:8, Jem 1:12, Rev 3:11 * **2:11:** Rev 20:14, 21:8 * **2:12:** Aes 49:2, Rev 1:16

Nægkiariien i səvəi iərmama sə rauvehi nau səvəi naruagəniien rəhiə ia nəkaren pəri mi. ¹³ *Iou iakukurən kwopun hiamarə ikin. Jea sə Setan raməkure irə mamərimənu in nəha ia kwopun nəha, mətə kimiaha hiamuvehi əknekən nəghik ia nəpin me, mhəpwəh nəkwafoien i mə hiamahatətə ia nirak. Pərhien hiəpwəh mwi nəkwafoien i fwe kupwən nəpin Antipas ramarə ihi. In iərmama riti səiou iakukurən nətigiteien irə. Rinərer irapw mægkiari ia nirak kousi əpune in ia taon səkimiaha, kwopun Setan ramarə ikin. ¹⁴ *Mətə narimnari me nepwın nəha ikin hiamo həkaturkwatukw mhə ia nənimək. Kimiaha me nepwın kamhəkurirə nahatəniien səvəi Palam. Palam nəha in rinahatən Kig Palak mə in trərhiərhi nəkur Isrel pwəh irəha ho noien ərəha, mhani nəveginien sə kiməuvei pen m nənimwi nari me sə kaməfwaki pen minraha, nənə, mhəiri əpnəpen irəha me. ¹⁵ Ia noien nəha kimiaha nepwın mwi kamhəkurirə nahatəniien səvəi nərmama me səvəi Nikolas. ¹⁶ Ro iamınhi irə tihərərīg ia noien ərəha me səkimiaha. Mə hiəpwəh, trıpkə mhə tui iakuvehe tukumiaha, mousi nərmama me nəha, mərai irəha ia nau səvəi naruagəniien sə ruku pen ia nıpəgi nəkwak mier.

¹⁷ *Iərmama sə nəkwəregın rarə traməkeikei mətərīg amasan ia nəgkiariien me səməme Nənimwın Ikinan rani pen ti nakalasia me. Iərmama sə trıskai meste naruagəniien rukurau

* **2:13:** Rev 3:8 * **2:14:** Nam 22–24, Nam 25:1-2, Nam 31:16,
2Tes 2:15 * **2:17:** Eks 16:4,14-15, Jon 6:48-50, Aes 62:2, Rev 3:12,
19:12

takuvehi nāveginien i ramærkwafə, nāghin nā mana, muvehi muvei pen min. Nənə takuvei pen mwi kəpwier əpsan riti min sə kimərai pen nəhag vi irə. Nəhag vi nəha nərmama hāreirei. Iərmama sə truvehi kəpwier nəha in əpa trukurən.”

Nəgkiariien ramevən ti nakalasia me ia Tuatira

¹⁸ * “Rai nəkukuə riti revən ti agelo səvəi nakalasia me ia taon nəha Tuatira, mini pen minuə:

Nəgkiariien i nəgkiariien səvəi Tini Kumwesən sə nənimen mi krauəhiapw rəmwhen ia napw, nənə nisun mi krouəmwhen ia aean i pras sə kinahakwi kahakwi amasan. ¹⁹ Iou iakukurən noien me səkimiaha. Iakukurən nokeikeiien səkimiaha, mine nahatətəien səkimiaha, mine nasituien sə hiamo m nərmama. Iakukurən mə hiamərer əknekīn ia nəpīn me. Iakukurən mə noien amasan me hiamo ipwet mine irəha həpik mhəpi raka noien amasan me hiənamo fwe kupwən.

²⁰ * Mətə nari riti nəha ikin hiamo ripkatukwatukw mhə ia nənimek. Kimiaha hiaməsəni noien səvəi pran nəha Jesepele. In rani mə in profet riti, mətə nahatənien səvənhi rameikuə ia iotukwininari me səiou, mamə irəha nərman mine nīpran kamhəiri əpnəpen irəha me, nənə mamhani nāveginien sə kiməuvei pen m nənimwi nari me səməmə kaməfwaki pen minraha. ²¹ Iakeitenhi pran nəha mə in trirərig ia noien ərəha səvənhi, mətə in rəpwəh nokeikeiien mə tro iamīnha

* **2:18:** Rev 1:14-15 * **2:20:** 1King 16:31, 2King 9:22, Rev 2:14

irə. ²² Ro pen, hətoni ro, takuvei pen nemhəien skai riti min, mərarki irapw in raməmisə a ia nīməhan səvəhi. Nərmama me nəha kamho əpnəpen nari irəha min takərarki pen irəha ia nəmisəien asori. Tako iamınha irə trini minuə irəha həpwəh nırərigien ia noien ərəha me səvəi prən nəha. ²³ *Nənə nıpwənəti prən nəha takousi əpune irəha. Ro iamınhi irə nakalasia me pam tuhəukurən mə iou i iərmama iakamətə pui nətərigien səvəi nərmama mine rerinraha me, nənə takərpwın pehe nərəkuien m kimiaha kuatia kuatia resi pen a noien me səkimiaha. ²⁴ Mətə iakukurən mə kimiaha me nepwın fwe Tuatira hiəpkukurirə mhə nəgkiariien səvəi Jesepele. Hiəreirei nəgkiariien me nəha kamını mə, ‘Nəgkiariien anan me səvəi Setan in ramərkwafə ia təkutan.’ Iakani pehe tukumiaha i mə nari pam riti mwi riwən sə takəmri pehe ia kimiaha mə tiho, ²⁵ *mətə tihaməkeikei mhəkwtəmhiri əknekın nəri sə hiəuvəuvehi raka meste takuvehe.

²⁶ Iərmama sə triskai meste naruagəniien rukurau, mamə mwi nəfe iakiməni mə tro mevən meste nəpın sampam, iərmama nəha takuvei pen nasoriien min, in trasori ia nərmama ia tənəmtənə me.

²⁷ *‘In truvehi nəri skai riti sə rəmwhen ia nep ramahatən pen nasoriien səvəi kig. In tramərimənu ia nırəha, mamətəftefi irəha rəmwhen kamousi testesi tekinari me i kınə ia nise tıprənə.’

* **2:23:** Sam 7:9, Jer 11:20, Jer 17:10, 2Tim 4:14, Rev 20:12-13

* **2:25:** Rev 3:11 * **2:27:** Rev 12:5

28 *Ni p̄arhienien iou takuvei pen nasorien min r̄amw̄hen Tata s̄aiou r̄im̄auvei pehe miou. N̄an̄ə takuvei pen m̄wi k̄əm̄əhau i kof̄ət̄əteia min.
 29 Īərmama s̄ə n̄ək̄w̄əreḡin rar̄ə tram̄əkeikei m̄ət̄əriḡ amasan ia n̄əḡkiariien me s̄əm̄əme N̄ənim̄w̄in Ikinan rani pen ti nakalasia me.”

3

N̄əḡkiariien ramev̄ən ti nakalasia me fwe Satis

1 * “Rai n̄əkukuə riti rev̄ən ti agelo s̄əv̄əi nakalasia me ia taon n̄əha Satis, m̄ini pen m̄inuə:

N̄əḡkiariien i s̄əv̄əi īərmama s̄ə rauvehi n̄ənim̄w̄in me s̄əv̄əi Kumwes̄ən ir̄əha pam sefen, n̄ən̄ə mauvehi m̄wi k̄əm̄əhau me ir̄əha pam sefen. Iou iakukur̄ən noien me s̄ək̄im̄iaha. Iakukur̄ən m̄ə kani n̄əḡhim̄iaha m̄ə kim̄iaha hiam̄əmiru, m̄ət̄ə rek̄əm. Kim̄iaha hīəuvam̄h̄ə raka. 2 H̄ətui r̄ə! Triḡko mh̄ə tui noien amasan me s̄ək̄im̄iaha hīənamo fwe kupw̄ən tuh̄əiw̄ən anan. M̄ət̄ə tih̄am̄əkeikei mh̄ousari m̄ə tih̄əuvehi ut̄ə m̄wi noien me s̄ək̄im̄iaha mh̄o h̄əuvehe mh̄əskai, ti n̄əri n̄ə m̄ə iak̄əpw̄əh̄ ihi n̄ətonien noien amasan riti s̄ə hīəno mh̄əuv̄ən mh̄o sampam ir̄ə n̄ən̄ə ratukwatukw̄ ia n̄əmri Kumwes̄ən s̄aiou. 3 * Ro pen rer̄im̄iaha tram̄rhi n̄əḡkiariien s̄ə hīəuv̄əuvehi raka mh̄əregi k̄in̄ahat̄ən kim̄iaha ir̄ə fwe kupw̄ən. Tiho n̄əḡkiariien n̄əha, mh̄ər̄əriḡ ia noien ər̄əha me s̄ək̄im̄iaha. Tr̄ini m̄inuə hīəpw̄əh̄ n̄ətuiien, takuvehe tukum̄iaha r̄əm̄w̄hen ia rakres, n̄ən̄ə tih̄əreirei n̄əfe n̄əp̄in takuvehe tukum̄iaha ir̄ə.

* 2:28: Rev 22:16 * 3:1: Rev 1:4,16, 2:2 * 3:3: Rev 2:5, 1Tes 5:2

⁴ *Mətə kımiaha nepwın a nə ia Satis tınari səvənraha rıpkəmkemık mhə ia noien ərəha. Irəha tuhavən irəha miou ia tınari əpsan ti nəri nə mə irəha hatukwatukw. ⁵ *Iərmama sə trıskai meste naruagənien rukurau in trarkahu ia tınari əpsan, nənə ko iapkuvehi raka mhə nəghın ia nəkukuə səvəi nımıruien. Ia nəmri Tata səiου mine nəmri nagelo me takini irapw nəghın mə in iərmama riti səiου. ⁶ Iərmama sə nəkwəregın rarə traməkeikei mətərig amasan ia nəgkiariien me səməme Nənimwın Ikinan rani pen ti nakalasia me.”

Nəgkiariien ramevən ti nakalasia me fve Filatelfia

⁷ *“Rai nəkukuə riti revən ti agelo səvəi nakalasia me ia taon nəha Filatelfia, mını pen mınıuə:

Nəgkiariien me i səvəi Iəmə Ikinan, Iəmə sə rani nıpərhiēnien. In rauvehi ki səvəi Kig Tevit. Trini mınıuə rəsevər ia təpinhə riti, iərmama riti ko rıpkərəpinhə mhə. Nənə trini mınıuə in rərəpinhə ia təpinhə riti, iərmama riti ko rıpkəsevər mhə. ⁸ *Iou iakukurən noien me səkımiaha. Hətoni ro. Iakinəsevər ia təpinhə riti tukumiaha, təpinhə i iərmama riti ko rıpkərəpinhə mhə. Iakukurən mə nıskaiien səkımiaha rouihi a, mətə hiaməkwətəmhiri nəgkiariien səiου, mhəpwəh nərkwafəien mə kımiaha nərmama me səiου. ⁹ *Həregi ro. Nərmama me nəha ia nousəsımwınien

* **3:4:** Jut 23 * **3:5:** Mat 10:32, Luk 10:20 * **3:7:** Aes 22:22

* **3:8:** 1Kor 16:9, Rev 2:2 * **3:9:** Rev 2:9, Aes 45:14, Aes 49:23, Aes 60:14

səvəi Setan həni mə irəha nəkur Isrel (mətə rekəm irəha ieikuə me) iou tako irəha həuvehe mhənimwi nukurhunraha ia nisumiaha, mhəsiai kimiaha, nənə mhəukurən mə iou iakokeikei kimiaha. ¹⁰ *Nənə ti nəri nə mə kimiaha hiaməkwtəmhiri nəgkiariien səiou, mamhərer əknekən ia nəpən me, iou mwi takəkwtəmhiri kimiaha, mamarə tukumiaha ia nəpən sə rīpko mhə tui ruvehe nərmama me pam ia təkure tīprənə tuhəregi nəmisəien irə mə trətə sas ia nahatətəien səvənraha.^a

¹¹ *Trīpko mhə tui iakuvehe. Tihəkwtəmhiri əknekən narimnari me səməme hiəuvəuvehi raka mə iərmama riti trəpwəh nakresien nərəkuien səkimiaha sə hiamaiu tukwe.

¹² *Iərmama sə trīskai meste naruagəniien rukurau, iou tako in rəmwhen ia nei skai riti krīpesu nimwə səvəi Kumwesən səiou irə. Nənə in trīpkier mhə ia nimwə nəha ia nəpən riti. Nənə takrai pen nəghi Kumwesən səiou irə, mine nəghi taon səvəi Kumwesən səiou irə. Taon nəha in Jerusalem vi sə truku pen ia neiai meiwaiu pehe. Nənə takrai pen mwi nəghik vi ia iərmama nəha. ¹³ Iərmama sə nəkwəregin rarə traməkeikei mətərig amasan ia nəgkiariien me səməme Nənimwən Ikinan rani pen ti nakalasia

* **3:10:** Luk 21:19, 2Tim 2:12 a **3:10:** Suatuk riti mwi ti niniien nəgkiariien ia vas ten rini iamənhi irə minuə: “Nənə ti nəri nə mə kimiaha hiaməkwtəmhiri nəgkiariien səiou, mamhərer əknekən ia nəpən me, iou mwi takəkwtəmhiri kimiaha, məpwəh nəseniien hiətəni nəpən sə rīpko mhə tui ruvehe nərmama me pam ia təkure tīprənə tuhəregi nəmisəien irə mə trətə sas ia nahatətəien səvənraha.” * **3:11:** Rev 2:10,16 * **3:12:** Aes 62:2, 65:15, Esik 48:35, Rev 14:1, 21:2

me.”

Nægkiariien ramevæn ti nakalasia me fwe Laotisia

¹⁴*“Rai nækukuæ riti revæn ti agelo sævæi nakalasia me ia taon næha Laotisia, mini pen minuæ:

Nægkiariien i sævæi iærmama i kani nîpærhienien iræ. In iærmama sæ rimæni irapw næfe in rinætoni mîregi nærmama hæukuræn nætigiteien ia nægkiariien sævænhi mæ ro nîpærhienien, nænæ in nukune narimnari me pam sëmæme Kumwesæn rino. ¹⁵ *Iou iakukuræn noien me sækimiaha. Iakukuræn mæ kîmiaha hiæmwhen ia nui æreuæn. Hiæpwæh nækwieiiien mhæpwæh næpnæpanien. Iakuæ ko hiækwiei uæ hiæpnæpan ramasan. ¹⁶ Mætæ kîmiaha hiæreuæn a, mhæpwæh næpnæpanien, mhæpwæh nækwieiiien. Ro pen takærgavæs raka ia kîmiaha, ¹⁷ *ti næri næ mæ hiamæni mæ nautæ sækimiaha rasori, narimnari me pam raræ tukumiaha, tihætui nari riti mwi ti næfe. Mætæ hiæreirei mæ ia nænimek kîmiaha nautæ sævænraha riwæn, nænimemiaha rifwæ, tinari riwæn ia nîpwramiaha, nîmapwmapw me ro kîmiaha, nærmama hætoni kîmiaha rerînraha ramæpou. ¹⁸ *Ro iamînhi iræ iakamævæhag m kîmiaha mæ tihamækeikei mhæuvehi næmri æean i kol tukw iou, kol i kosæ pen ia napw rahi raka sæ ræræha mæpwæh sæ ræmher. Tiho iamînhi iræ mæ nautæ sækimiaha trasori. Nænæ tihamækeikei mhæuvehi næmri tinari æpsan me tukw iou,

* **3:14:** Rev 1:5, 19:11, Kol 1:15 * **3:15:** Rom 12:11, Rev 2:2

* **3:17:** Hos 12:8, 1Kor 4:8, Luk 12:21 * **3:18:** Aes 55:1, Jem 2:5,

Rev 3:5, 4:4, Rev 16:15

mharkahu irə, pwəh ruvegi nīpwramiaha sə ramo naurisien ia nəmri nərmama. Nənə tihaməkeikei mhəuvehi mwi nəmri nari i ramomasan nəkwai nəmri iərmama, mahakwi nəmrimiaha irə, pwəh nəmrimiaha rətui hiətoni amasan nari.

¹⁹ *Nərmama səməme iakokeikei irəha, iakaməgkiari skai minraha, mamərpwi atukwatukw irəha. Ro iamīnhi irə tiho rerimiaha pwəh ruvehe məpnəpan, mapwor, nənə mhərərīg ia noien ərəha me səkimiaha.

²⁰ *Həregi ro! Iakamərer ia kwəruə, makunkun təpinhə ti nuvnimwəien. Trīni minuə iərmama riti rīregi rerik, nənə məsevər ia təpinhə, iou takuvmiwə pehe kimrau min trouəni pəri nari.

²¹ *Iərmama sə triskai meste naruagəniēn rukurau, takəsēni in rəkure kimrau min ia jea səiou rouərimənu. Tako irə rəmwheh kīno ia nirak. Iakuvəskai raka ia naruagəniēn meste rukurau, nənə təkwtəkwi iakaməkure kimrau səiou Tata ia jea səvənhi rouərimənu.

²² Iərmama sə nəkwəregin rarə traməkeikei mətərīg amasan ia nəgkiariēn me səməme Nənimwīn Ikinan rani pen ti nakalasia me.”

4

Jea riti fwe ia neiai Kumwesən raməkure irə mamərimənu

¹ *Iakinətə pam narimnari me i, nənə məti pen mətoni təpinhə riti ia neiai raməkwaḡ.

* **3:19:** 1Kor 11:32, Rev 2:5 * **3:20:** Jon 14:23, 1Jon 2:24

* **3:21:** Mat 19:28 * **4:1:** Rev 1:1,10

Nənə iərmama nəha iakuvəregi raka rerin fwe kupwən rəgkiari pehe mwi miou, rerin rupwinari rəmwhen ia reri kisipw, mini mə, “Utə pehe ia kwopun i. Iakuə takahatən narimnari me səməme tuhəuvehe kurirə pwəh ikətoni.” ² *Təkwtəkwwuni mwi iakətoni vison riti Nənimwɪn rəriari miou. Jea riti kərpwi ramərer ia neiai, Iəmə iti raməkure irə mamərimənu. ³ *Iəmə nəha raməkure irə ramser rəmwhen ia kəpwier amasan mi kəru jaspə mine kanilian. Nənə mərərən riti rukuraukurau ia jea səvənhi makuraan rəmwhen ia kəpwier amasan riti emeral. ⁴ *Jea me nepwɪn mwi irəha pam twenti-fo hərer kuraukurau jea nəha. Nəmə asori me irəha pam twenti-fo kamhəkure ia jea me nəha. Tinari me səvənraha həpsan. Ia kənkəpwənraha kəfəfau me səvəi nisiiien kino ia kol. ⁵ *Iəmə nəha raməkure ia kurkwan mamərimənu, nouapirien mine karuəruə mine nərkərikien kamharuku pen ia jea səvənhi. Kupwən ia jea səvənhi nərami napw irəha pam sefen kamhəuək. Nərami napw me nəha irəha nənimwɪn me səvəi Kumwesən irəha pam sefen. ⁶ *Nənə kupwən ia jea səvənhi nari riti mwi fwe ikin rəmwhen ia təsi, mətə rəmwhen ia klas sə rəriri məmher. Nərimiru me nepwɪn irəha pam kefə kamhərer kuraukurau jea səvənhi nukwai nənimenraha həpik ia nɪpwranraha kupwən mine kurirə. ⁷ Nərimiru me nəha sə kupwən irə rəmwhen ia laeon, sə ro kəru irə rəmwhen ia kau,

* **4:2:** Sam 47:8, Aes 6:1, Rev 4:9 * **4:3:** Esik 1:28 * **4:4:** Aes 24:23, Rev 3:18, 6:11 * **4:5:** Esik 1:13, Rev 1:4, 8:5, Rev 11:19, 16:18 * **4:6:** Esik 1:5-10,22, Esik 10:14

sə ro kahar irə kənkəpwə rəmwhen ia kənkəpwə iərmama, nənə sə ro kefə irə rəmwhen ia mīrup sə ramivə. ⁸ *Nərimīru me nəha kefə kuation kuation tərəginraha me sikis, nənə ia reri tərəginraha me mine təkurenraha nukwai nənimenraha həpik. Nəpīn me pam, ia nəpīn mine ia ran, irəha həpkəpwis mhə ti noskafəien i mə,

“Iəmə ikinan, Iəmə ikinan, Iəmə ikinan,
Iərimənu Kumwesən sə rauvehi niskaiien me pam!

In rinarə fwe kupwən, marə ipwet mine, mamevən meste tripkīwən mhə.”

⁹ *Ia nīpu nəha, nərimīru me nəha kamhəgnəgini Iəmə sə raməkure ia jea səvənhi mamərimənu. Irəha kamhəsiai in, mamhəni vivi Iəmə sə ramarə ia nuk nuk me. Nəpīn irəha kamho iamīnhi irə, ¹⁰ *nənə nəmə asori me nəha twenti-fo heiwaiu mhənimwi nukurhunraha ia nəmri Iəmə sə raməkure ia jea səvənhi mamərimənu. Irəha kamhəsiai Iəmə sə ramarə ia nuk nuk me, mamhərki pen səvənraha kəfəfau me səvəi nisaiien kupwən ia jea səvənhi, mamhoskafə iamīnhi irə mə,

¹¹ “Iərimənu mine Kumwesən səkimaha ikamasan pik.

Ikino narimnari me pam,
mesi pen nətərigien səim mo irəha kamharə.

Pwəh nəgnəginiien mine nisaiien mine niskaiien haruvehe tukw ik ia nəpīn me.”

* **4:8:** Aes 6:2,3, Esik 1:18, 10:12, Rev 1:4,8 * **4:9:** Dan 4:34, 6:26, Dan 12:7, Rev 4:2,10 * **4:10:** Rev 4:9, Rev 5:1,7,13, Rev 6:16, Rev 7:10,15, Rev 19:4, 21:5

5

Kwæti sipsip mine nimwai nækukuæ kinærfe

¹ *Nənə iakətoni Iəmə sə raməkure ia jea səvənhi mamərimənu in rauvehi nimwai nækukuæ riti ia rəgin mwatuk. Nimwai nækukuæ nəha kimərai pen nari ia nīkaren pəri mi, nənə kərfe kuvi tərini m sefen. ² Nənə iakətoni agelo riti nəgsen rasori raməgkiari asori maməni irapw mə, “Sin ratukwatukw mə treitehi raka nəri me nəha sefen kiməvi tərini nimwai nækukuæ irə nənə məsevər ia nimwai nækukuæ?” ³ Mətə iərmama riti riwən ia neiai, uə ia tīprənə, uə ia reri tīprənə, in ratukwatukw mə ko rəsevər ia nimwai nækukuæ i kinærfe mətī pen irə. ⁴ Nənə rerik rərkwəpīr iakasək tī nəri nə mə kīpkətoni mhə iərmama riti ratukwatukw mə ko rəsevər ia nimwai nækukuæ kinærfe mətī pen irə. ⁵ *Miregi nəmə asori me nəha irəha riti rini pehe tukw iou mə, “Əpwəh nasəkien. Mətoni ro. Iərmama sə rīməkupwən ia kwənəkwus səvəi Kig Tevit, kani nəghin mə ‘Laeon səvəi Juta,’ in ruvəskai raka meste naruagənien rukurau. Ro pen in rukurən nuvehien nimwai nækukuæ nəha kinærfe kuvi tərini m sefen məsevər irə.”

⁶ *Nənə iakəti pen mətoni kwæti sipsip riti ramərer ipaka tī jea səvəi Iəmə nəha raməkure mamərimənu ia kurkwai nərimiru me nəha kefə mine nəmə asori me nəha twenti-fo. Kwæti sipsip nəha iakətə rəmwhen mə kinousi əpune raka. Kənkəpati sefen, nənə, nukwai nənimen sefen. Nukwai nənimen me nəha irəha nəha nənimwīn me nəha sefen səvəi Kumwesən in

* **5:1:** Rev 4:2,10, Aes 29:11, Esik 2:9-10 * **5:5:** Jen 49:9, Aes 11:1,10, Rev 22:16 * **5:6:** Sek 4:10, Jon 1:36, Rev 1:4, 5:12, Rev 13:8

rinārhi pen irəha həuvən ia kwopun me ia təkure
 tīprənə. ⁷ *Nənə kwəti sipsip nəha revən ti
 Iəmə sə raməkure ia jea səvənhi mamərimənu,
 muvehi raka nīmwai nəkukuə nəha kinərfe ia
 rəgin mwatuk. ⁸ *Nəpin ruvehi nīmwai nəkukuə
 nəha kinərfe, nənə nərimiru me nəha kefə mine
 nəmə asori me nəha twenti-fo hənīmwi nukurhun-
 raha mheiwaiu ia nəmri kwəti sipsip. Irəha
 pam kamhəuvehi nəri kauəsi kaməni nīpu irə,
 mamhəuvehi mwi pesin me kino ia kol. Pesin
 me nəha kamhəuvehi həukuər ia nīmwəkmwəki
 nari kauvani nīpekin rapein amasan. Nise napw
 irə rəmwhen ia nəfwakiien me səvəi nərmama me
 səvəi Kumwesən. ⁹ *Irəha kamhoskafə ia nīpu vi
 riti, mamhəni mə,

“Ratukwatukw mə ik tikuvehi nīmwai nəkukuə i
 kinərfe,
 nənə məsevər irə.

Ik ikəmwhen ti nəri nə mə kinousi əpune ik,
 nənə nitem sə rīnaiu ikuvehi nəmri nərmama
 me irə, irəha səvəi Kumwesən.

Irəha nərmama səməme haməuku pen ia
 kwənəkwas me pam, mine nəgkiariien
 me pam, mine teki nərmama me pam, mine
 tənəmtənə me pam.

¹⁰ *Ik ikino irəha həuvehe mhəmwhen ia kig
 me mine pris me ia nəmri Kumwesən
 səkimaha,
 nənə irəha tuhərimənu ia tīprənə.”

* **5:7:** Rev 4:2,10 * **5:8:** Rev 8:3-4, 14:2, Rev 15:2, Sam 141:2

* **5:9:** Sam 33:3, 40:3, Sam 96:1, 98:1, Sam 144:9, Rev 14:3 * **5:10:**
 Eks 19:6, Aes 61:6, Rev 1:6, 20:6, Rev 22:5

11 *Nənə iakəti pen miregi reri nagelo me həpik həpik. Irəha kamhərer kuraukurau ia Iəmə sə raməkure ia jea səvənhi mamərimənu, mine nərimiru me, mine nəmə asori me. Nagelo me nəha irəha taosen m taosen uə ten-taosen m ten-taosen, 12 *kamhoskafə əpwəmwis, mamhəni mə, “Kwəti sipsip sə kinousi əpune, in ramasan pik.

Pwəh niskaiien, mine nautə, mine nukurəniien, mine nərimənuiien, mine nisaiiien, mine nasoriien, mine nəgnəginiiien həuvən tukwe in ia nəpən me.”

13 *Nənə iakregi narimnari me pam səməme Kumwesən rino ia neiai, ia təkure tıprənə, ia reri tıprənə, ia reri təsi, iakregi narimnari me pam səməme kamharə ia kwopun me nəha kamhoskafə, mamhani nıpu mə,

“Iəmə sə raməkure ia jea səvənhi mamərimənu mine kwəti sipsip,

pwəh nəgnəginiiien, mine nisaiiien, mine nasoriien, mine niskaiien, həuvən ti nırau ia nuk nuk me.”

14 Nənə nərimiru me nəha kefə həni mə, “Pwəh ro iamınhi!” Nənə nəmə asori me hənimwi nukurhunraha mheiwaiu, mhəuvei pen nisaiiien səvənraha mınrau.

6

Kwəti sipsip rəsevər ia nimwai nəkukuə sə kinərfe

1 *Ia nəpən nəha iakəti pen mətoni kwəti sipsip reitehi raka nəri nəha riti sə kiməvi tərini nimwai

* 5:11: Dan 7:10, Hip 12:22 * 5:12: 1Kron 29:11, Rev 5:6

* 5:13: Rev 4:2,10 * 6:1: Rev 4:6, 5:1

nəkukuə irə. Meitehi raka pam, nənə iakregi nərımıru me nəha kefə riti rəgkiari rerin rupwinari rəmwhen ia karuəruə mīni mə, “Uvehe!”

² *Nənə iakəti pen mətoni hos əpsan riti. Iəmə sə raməkure irə rauvehi nifagə. Kuvei pen kəfəfau səvəi nisaiien min. In rier mamevən rəmwhen iərmama riti sə rinaruagən pam, nənə traruagən mwi muvehi irapw niskaiien səvəi nərməpə.

³ Nənə kwəti sipsip reitehi raka nəri sə ro kəru irə kıməvi tərini nīmwai nəkukuə irə. Meitehi raka pam, nənə iakregi nərımıru me nəha kefə sə ro kəru irə rini mə, “Uvehe!” ⁴ Nənə hos riti mwi ruvehe hos əruerəv. Iərmama sə raməkure irə kuvei pen nau asori riti səvəi naruagənien min. Kınəsəni in mə trevən mo nərmama ia təkure tıprənə haruagən mhousi əpune irəha me.

⁵ Nənə kwəti sipsip reitehi raka nəri sə ro kahar irə kıməvi tərini nīmwai nəkukuə irə. Meitehi raka pam, nənə iakregi nərımıru me nəha kefə sə ro kahar irə rini mə, “Uvehe!” Nənə iakəti pen mətoni hos pitəv riti. Iərmama sə raməkure irə rauvehi nəri sə kaməkiri nari irə. ⁶ Nənə iakregi reri iərmama riti ruku pen ia kurkwai nərımıru me nəha kefə, mamini mə, “Evən. Kınəsəni ik mə tiko nukumhə ravən ia tənəmtənə me. Nərmama tuhərarki mane asori ti nuvehien nəveginien rouihi a. Mətə tikəpwəh nourahaien nukune nei me nəha olif kamo oel ia nukwan mīne nukune nəkwwus me nəha krep kamo waen irə.”

⁷ Nənə kwəti sipsip reitehi raka nəri sə ro kefə irə kıməvi tərini nīmwai nəkukuə irə. Meitehi raka pam, nənə iakregi nərımıru me nəha kefə sə ro kefə

* **6:2:** Sek 1:8, 6:1-6

irə rini mə, “Uvehe!” ⁸ *Nənə iakəti pen mətoni hos əmrakw riti. İərmama sə raməkure irə nəghin nə Noien İərmama Remhə. In riti nəghin nə Imwei Nəkur Həuvamhə rakurirə irə rauevən. Kinəsəni pen nərmama pam ia təkure tıprənə ia rəginrau. İrau troueven rouəvsini irəha kefə kefə, rouo kua-tia remhə rouəpwəh kahar kamharimiru. Nepwın tuhemhə ia naruagəniən. Nepwın nəveginiən triwən ti nirəha hemhə. Nepwın nemhəien truvehi irəha hemhə. Nepwın nəri əprmin me tuhahi əpune irəha.

⁹ Nənə kwəti sipsip reitehi raka nəri sə ro krirum irə kiməvi tərini nımwai nəkukuə irə. Meitehi raka pam, nənə iakəti pen fwe nisui nıfatə pi-rapw mətoni nərmama səməme kinousi əpune irəha ti nəri nə mə kamhəni irapw nəgkiariien səvəi Kumwesən, mamhəni mə in ro nıpərhienien.

¹⁰ *İrəha kamhəkwein əpwəmwis mə, “İərimənu asori. İk İəmə ikinan. İk nıpərhienien. Nərmama ia təkure tıprənə hənousi əpune kimaha. İkafwini mə tinesən ikərpwın pen noien ərəha səvənraha?”

¹¹ *İrəha həni iamınha irə, nənə kuvei pen tinari əpsan mınraha kuatia kuatia, kını pen ti nirəha i mə tuhapwis ouihi a mwi meste tukukupwən kousi əpune pam piəvnraha me nepwın mwi səməme hənəmo tukwini pəri nari irəha mınraha fwe kupwən.

¹² *Nənə kwəti sipsip reitehi raka nəri sə ro sikis irə kiməvi tərini nəkukuə irə. Meitehi raka pam, nənə iakəti pen mətoni nımwnımwien asori

* **6:8:** Jer 15:1-3, Esik 5:12,17, Esik 14:21, Esik 33:27 * **6:10:** Rev

16:7, Dut 32:43, Sam 79:10 * **6:11:** Rev 3:18, 7:9,13, Rev 19:14

* **6:12:** Mat 24:29, Wok Me 2:20, Rev 8:12

riti ravən. Meri ruvehe mīpitəv mīpitəv. Məkwə ruvehe mərueɾəv rəmwhen ia netə. ¹³ *Nənə kəməhau me fwe irənhə ia nei ai həsas mhei waiu ia tīprənə rəmwhen ia nei riti nīmətəgi asori rikiukiu irə nukwan me həsas. ¹⁴ *Kəpuapen ruvehe miwən məmwhen ia nīmwai nəkukuə iərmama ruvehi məfe raka i. Nənə təkuər me mine tənə əmweris me haraka ia təmwhəkīnraha me.

¹⁵ *Nənə kīg me ia tīprənə, mine ieni me, mine nəmə asori me səvəi naruağən me, mine nərmama nautə səvənraha rasori, mine nərmama nəgsenraha rasori, irəha mine nərmama pam nəri auər a mə irəha slef uə həpko mhə irəha slef, həuvən ia təkuər me mhərkwafə ia nīpəgi kəpwier me mine reri kəpwier me, ¹⁶ *mamhəkwein pen təkuər me mine kəpwier me mamhəni mə, “Tiho mhəsas mhəkure tərini kimaha, mhərkwafə kimaha, pwəh iəmə nəha raməkure ia jea səvənhi mamərimənu rəpwəh nətonien kimaha, pwəh niemaha səvəi kwəti sipsip rəpwəh nesteien kimaha. ¹⁷ *Kwa nəpīn asori səvəi niemaha səvənrau ruvəuvehe. Sin nəghīn ko rərər irapw?”

7

Agelo rəmri pen mak səvəi Kumwesən ia nəkur Isrel irəha pam 144,000

¹ *Kurirə ia narimnari me i iakətoni nagelo me kefə kamhərer ia təkure tīprənə i riti ia nīkaren pesu, riti ia nīkaren parei, riti ia nīkaren prehi,

* **6:13:** Aes 34:4 * **6:14:** Aes 34:4, Rev 16:20 * **6:15:** Aes 2:10,19,21 * **6:16:** Luk 23:30, Rev 4:2,10 * **6:17:** Joel 2:11, Neham 1:6, Mal 3:2 * **7:1:** Jer 49:36, Dan 7:2

riti ia nīkaren peraha. Irəha kamhəkwtəmhiri nīmətagi me pam nəha kefə mə nīmətagi triwən ia təkure tīprənə mine təsi mine nei me. ² Nənə iakəti pen mətoni agelo riti mwi ruku peraha mauvehi nari riti tromak ia nərmama irə tra-hatən pen mə Kumwesən sə ramiru səvənhi me nərmama me nə irəha. Agelo i rəkwein əpwəmwis nagelo me nəha kefə səməme kīnəsēni irəha mə tuhouraha tīprənə mine təsi. ³* In rini pen ti nīrəha i mə, “Həpəpim narakaien nīmətagi pwəh rəpwəh nourahaien tīprənə mine təsi mine nei me. Pwəh iako pen raka mak səvəi Kumwesən səkitaha ia nīpwənai iotukwininari me səvənhi me.” ⁴* Nənə iakregi kīni nərmama me nəha səməme həuvehi mak səvəi Kumwesən irəha pam wan-hantret-foti-fo-taosēn. Nərmama me nəha komak ia nīrəha həuku pen pam ia kwənəkwus me səvəi nəkur Isrel.

⁵ Ia kwənəkwus səvəi Juta, nərmama irəha pam twelef-taosēn.

Ia kwənəkwus səvəi Rupen, nərmama irəha pam twelef-taosēn.

Ia kwənəkwus səvəi Kat, nərmama irəha pam twelef-taosēn.

⁶ Ia kwənəkwus səvəi Aser, nərmama irəha pam twelef-taosēn.

Ia kwənəkwus səvəi Naftali, nərmama irəha pam twelef-taosēn.

Ia kwənəkwus səvəi Manase, nərmama irəha pam twelef-taosēn.

⁷ Ia kwənəkwus səvəi Simeon, nərmama irəha pam twelef-taosēn.

* **7:3:** Esik 9:4,6, Rev 9:4 * **7:4:** Rev 14:1,3

Ia kwənəkwus səvəi Livæ, nərmama irəha pam twelef-taosən.

Ia kwənəkwus səvəi Isakar, nərmama irəha pam twelef-taosən.

⁸ Ia kwənəkwus səvəi Sepulun, nərmama irəha pam twelef-taosən.

Ia kwənəkwus səvəi Josef, nərmama irəha pam twelef-taosən.

Nənə, ia kwənəkwus səvəi Penjamin, nərmama irəha pam twelef-taosən.

Nərmama həpik tinari səvənraha rəpsan

⁹ *Kurirə ia narimnari me i iakəti pen mətoni nərmama həpik ko kirkəvsini pam mhə irəha. Irəha haməuku pen ia tənəmtənə me pam, mine kwənəkwus me pam, mine teki nərmama me pam, mine nəgkiariien me pam. Kamhərer ia nəmri Iəmə sə raməkure ia jea səvənhi mamərimənu mine ia nəmri kwəti sipsip. Irəha kamharkahu tinari əpsan me, mamhəuvehi nimwai nəmwir me ia rəginraha, ¹⁰ *mamhəkwein əpwəmwis mamhəni mə,

“Kumwesən səkimaha sə raməkure ia jea səvənhi mamərimənu irau kwəti sipsip, irau nəha krino suatuk ti nuve-himiriuen kitaha!”

¹¹ Nagelo me pam hərer kuraukurau ia jea Kumwesən raməkure irə mamərimənu, nənə, mhərer kuraukurau mwi ia nəmə asori me, mine nərimiru me nəha kefə. Nənə irəha hənimwi nukurhunraha kupwən ia jea səvəi Kumwesən, mheiwaiu nənimenraha rirapi tıprənə, nənə, mamhəsiai in, ¹² *mamhəni mə,

* **7:9:** Rev 3:18 * **7:10:** Rev 4:2,10 * **7:12:** Rev 5:12, 11:17

“Pwəh ro iam̄inhi!
 Pwəh nini viviiien, m̄ine nəgnəginiiien,
 m̄ine nukurənien, m̄ine tanak, m̄ine n̄isiaiiien,
 m̄ine nər̄im̄ənuiien, m̄ine n̄iskaiien,
 həuvən ti Kumwesən səkitaha ia nuk nuk me.
 Pwəh ro iam̄inhi!”

13 *Nənə nəmə asori me nəha riti ia nirəha rəres iou mə, “N̄isimə nəha kamharkahu ia tinari əpsan me? Irəha haməuku pəku?”

14 *Miregi iakini mə, “Iəmə asori. Ik a ikukurən.”

Miregi rini mə, “Irəha nərmama me nəha səməme kamhəier ia nəp̄in nəha kiməni mə truvehe nərmama tuhəregi nəm̄isəien irə rasori pik anan. Irəha hənaikuas ia tinari me səvənraha mho həpsan ia n̄ite kwəti sipsip. 15 *Ro pen irəha kamhərer ia nəmri Kumwesən sə raməkure ia jea səvənhi mamərimənu. Irəha həmw̄hen ia pris me səməme kamho tukwini pen nari min ia nəp̄in m̄ine ia ran ia nəkwai nimwə səvənhi. Nənə Kumwesən sə raməkure ia jea səvənhi mamərimənu in trəuiui irəha nəp̄in me pam.

16 *Nukumhə tripkahi mhə mwi irəha.

Irəha tuhəpkək̄wakwa mhə mwi.

Nukwəsikər tripkənhi mhə irəha,

uə nəpnəpanien asori səvəi meri tripkənhi
 mhə irəha,

17 *ti nəri nə mə kwəti sipsip nəha ia kurkwai jea sə Kumwesən raməkure irə mamərimənu in trətui amasan ti nirəha rəm̄w̄hen iərmama riti sə ramətui amasan ti sipsip me səvənhi.

In triri irəha mhəuvən ti nəmri nuim̄iru me.

* 7:13: Rev 3:18

* 7:14: Mat 24:21

* 7:15: Rev 4:2,10

* 7:16: Aes 49:10

* 7:17: Sam 23:2, Aes 25:8, Jon 10:11, Rev

5:6, 21:4

Nənə Kumwesən trīrai raka pam nise nəmriŋraha.’”

8

Kwəti sipsip reitehi raka nəri sə ro sefen irə kīməvi tərini nīmwai nəkukuə irə

¹ *Nəpīn kwəti sipsip reitehi raka nəri sə ro sefen irə kīməvi tərini nīmwai nəkukuə irə, nənə kwənamriḡ fwe ia neiai meste nīpəri aoa riti.

² Nənə iakətoni nagelo me nəha sefen səməme kamhərer ia nəmri Kumwesən ia nəpīn me kīməpeki pen kisipw kuatia kuatia mīnraha.

³⁻⁴ * *Agelo riti mwi nəha ikin rauvehi nari riti kino ia kol. Nəri nəha rukuər ia nīmwəkmwəki nari kauvani nīpekin rapein amasan. Kuvei pen nīmwəkmwəki nari nəha min mə truvani ia təkure nifatə nəha kino ia kol ramərer kupwən ia jea sə Kumwesən raməkure irə mamərimənu pwəh nise napw irə rousəsīmwin irəha nəfwakiien me səvəi nərmama me pam səvənhi. Ro iamīnhi irə agelo nəha ruvehe mərəer pen ia nifatə nəha, muvani nīmwəkmwəki nari nəha rīpīk, nənə nise napw irə rousəsīmwin irəha nəfwakiien me səvəi nərmama me səvəi Kumwesən, həutə ia nəmri Kumwesən.

⁵ *Nənə agelo nəha ruvehi nukumheəv rauək ia təkure nifatə, mərki pen i ia nəri nəha in rauvehi rukuər, mərarki irapw ia təkure tīprənə i, nənə nouapīrien rəhiapw, karuəruə rərkwəpahar, kregi nərkarīkien, nīmwnīmwiēn ravən.

Kisipw me irəha pam sefen

* **8:1:** Hab 2:20 * **8:3-4:** Rev 5:8, Eks 30:1-3, Rev 9:13 * **8:3-4:** Rev 5:8 * **8:5:** Lev 16:12, Eks 19:16-19, Rev 4:5, 11:19, Rev 16:18

6 Nənə nagelo me nəha sefen səməme kamhəuvehi kisipw kamhəpnəpenə ti nəseien kisipw. 7 *Nagelo me nəha sə kupwən rəse kisipw səvənhi, nənə aes mine napw mine netə ho a kərapi irə kətəgi irapw ia tīprənə i. Ruək mahi nīpəri tīprənə, məpwəh nīpərin kəru, nənə mahi nei me nīpərinraha kuatia, məpwəh nīpərinraha kəru, nənə mahi pam nurhi merə me.

8 *Agelo sə ro kəru irə rəse kisipw səvənhi, nənə nari riti rəmwhen ia təkuaer asori rauək kərarki pen ia təmwei təsi. Nənə nīpəri təsi kwatia ruvehe mo netə irə, nīpərin kəru krouamasan. 9 Nərimiru me ia təmwei təsi nīpərinraha kuatia hemhə, nīpərinraha kəru kamhəmīru, nənə nītətə me səməme kamhəiu ia təsi ko koeite irəha pam kuai irəha ia kusen kahar harəmnəmwhen a kusen kuatia ruvehe mərəha kəru krouamasan.

10 Agelo sə ro kahar irə rəse kisipw səvənhi, nənə kəməhau asori riti rauək rəmwhen ia kwənhiə rier raka ia neiai, meiwaiu məsas pen ia nui aris me mine nəmri nui me, mouraha nīpərin riti məpwəh kəru krouamasan a. 11 *Kəməhau nəha nəghin nə Nəfiəien. Nui me nəha reste irəha həuvehe mhəfiə. Nənə nərmama həpik hemhə ti nəri nə mə hənīmwi nui əfiə.

12 *Agelo sə ro kefə irə rəse kisipw səvənhi, nənə nari riti ro meri mine məkwə mine kəməhau me ro pen həpwəh nuəkien ia nəpin pekīn. Ia ran meri rauək ia nīpərin kəru, məpwəh nuəkien ia nīpərin kuatia. Ia nəpin məkwə mine kəməhau

* 8:7: Eks 9:23-26, Esik 38:22, Joel 2:30

* 8:8: Eks 7:20-21

* 8:11: Jer 9:15 * 8:12: Rev 6:12-13

me kamhæuæk ia nipærin kæru, mæpwæh nuækien ia nipærin kuatia.

¹³ *Nænə iakæti pen mætoni mirup riti ramivə irənhə ia nimagouagou. Iakregi ramasæk əpwəmwis, mamini mə, “Aueh! Aueh! Aueh! Nagelo mirəhar nəha na tuharəse kisipw me səvənrahar. Trərəha anan tukumiaha nərmama səməme hiamarə ia təkure tiprənə.”

9

¹ *Agelo sə ro krirum irə raməse kisipw səvənhi, nənə iakætoni kəməhau riti rukrutə ia neiai mimwei irapw ia təkure tiprənə. Kiməuvei pen ki riti min. Ki nəha səvəi nəsevərien ia nipæg sə rameiwaiu nukunen riwən. ² *Kəməhau nəha rəsevər ia nipæg nəha nənə nise napw ruku pen fwe ikin mutə rəmwhen ia nise napw sə rasori pik anan. Meri mine nimagouagou kroupitəv ia nise napw sə ruku pen ia nipæg nəha. ³ *Nænə kəmnhəvt me hæier raka ia nise napw nəha mheiwaiu ia tiprənə. Kiməuvei pen niskaiien minraha mə tuhəpi nərmama ia nipikinraha, mho nəmisəien minraha rəmwhen ia mimi nəha skopion sə ramərkou ia tiprənə. ⁴ *Kiməni pen ti kəmnhəvt me i minuə tuhəpwəh nourahaien nurhi mine nei me mine narimnari me səməme kamhəuverə ia təkure tiprənə, mətə tuhouraha əpa nərmama me nəha səməme mak səvəi Kumwesən riwən ia nipwənanraha. ⁵ Kinəsəni irəha mə tuhəpi nərmama mho nəmisəien minraha meste məkwə krirum, mətə tuhəpwəh nəpi əpuneien irəha.

* **8:13:** Rev 9:12, 11:14 * **9:1:** Rev 20:1 * **9:2:** Jen 19:28,
Eks 19:18, Joel 2:2,10 * **9:3:** Eks 10:12,15 * **9:4:** Rev 7:3

Nəmisəien nəha tuhəregi rərəha irə rəmwhen ia nəmisəien səvəi mimi nəha skopion nəp̄in rəpi iərmama riti. ⁶ *Ia nəp̄in me nəha nərmama tuhətui suatuk ti nemhəien, mətə ko həpkətoni mhə. Tuhokeikei mə tuhemhə, mətə ko həpkemhə mhə.

⁷ *Kəmmhəvt me nəha, iakətə irəha həmwhen ia hos me kamhərer mwatuk ti naruagəien. Ia nukwənenraha kəfəfau me həmwhen ia kəfəfau səvəi nisaiien kino ia kol. Nənimenraha rəmwhen ia nəmri nərmama. ⁸ *Nukwənenraha rəpwəmwis rəmwhen ia nukwəne pran. Rev̄inraha rəhiə rəmwhen ia rev̄i laeon. ⁹ *Səvənraha karkahu kino ia aean kamhəvegi kwənpwenhinraha irə səvəi naruagəien. Tərəginraha kamhəpuk pik rəmwhen hos me səməme kamhəvkəkini kat me mamhaiu mamhəuvən ti naruagəien. ¹⁰ Nipikinraha ro rev̄in irə rəmwhen ia nipiki mimi nəha skopion. Niskaiien səvənraha tuho nəmisəien m nərmama irə meste məkwə krirum raməmāk ia nipikinraha. ¹¹ Səvənraha riti nəha ikin iəmə asori ramərimənu ia nirəha. In nə agelo səvəi nipəg sə rameiwaiu nukunen riwən. Ia nəgkiariien Hipru nəghi agelo nəha Apoton. Ia nəgkiariien Krik nəghin nə Apolion (nipwran mə Kərietaha).

¹² *Aueh! Nərəhaien kupwən ruvehe muvavən. Mətə aueh, aueh, hətə ro! Nərəhaien kəru mi nəha ikin troupkuvehe mwi.

¹³ *Agelo sə ro sikis irə rəse kisipw səvənhi, nənə

* **9:6:** Job 3:21, Jer 8:3, Rev 6:16 * **9:7:** Joel 2:4 * **9:8:** Joel 1:6 * **9:9:** Joel 2:5 * **9:12:** Rev 8:13 * **9:13:** Rev 8:3

iakregi reri iærmama riti ruku pen ia nipæsegi nifatæ næha kefæ sæ kîno ia kol ramærer kupwæn ia Kumwesæn. ¹⁴ *Reri iærmama næha rægkiari m agelo i ro sikis iræ sæ rauvehi kisipw næha, mini pen tukwe in mæ, “Fi nari ia nagelo me næha kefæ sëmæme kînærihi iræha fwe kupwæn kamharæ fwe nui aris asori næha Iufretes.” ¹⁵ *Ro iamînhi iræ kifî nari ia nagelo me næha kefæ. Kînæpnæpenæ raka ia nagelo me næha kamheitenhi aoa næha, næpin næha, mækwæ næha, mine nuk næha, mæ tukifî nari ia niræha hæuvæn mhævsini pam nærmama ia tækure tîprænæ, mhæuai iræha ia kusen kahar haræmnæmwhen a, mhousi æpune riti mhæpwæh kæru. ¹⁶ Nænæ iakregi kîni mæ naruaagæn me sævænraha sëmæme kamhækure ia hos iræha pam tu-hantret-milian.

¹⁷ Ia vison sæiou iakætoni hos me næha mine nærmama sëmæme kamhækure ia hos me. Iræha harkahu ia tinari sævæi naruaagænien kîno ia aean, mhævegi kwænpwenhinraha iræ. Tinari me næha rærueræv, mo plu, makwes. Kænkapwæ hos me næha hæmwhen ia kænkapwæ laeon me. Napw mine nise napw mine tæpisi æræha kamharuku pen ia nipægi nækwænraha mamharier ¹⁸ mharousi æpune pam nærmama ia tænæmtænæ me ia kusen kuatia mharæpwæh kusen kæru. ¹⁹ Niskaiien sævæi hos me næha in næha ia nipægi nækwænraha mine nipikînraha, ti næri næ mæ nipikînraha ræmwhen ia snek sæ ro kænkapwæ ia nusvenhin. Ia nipikînraha me ho næmisæien m nærmama.

* **9:14:** Rev 16:12 * **9:15:** Rev 8:7-12

20 *Mætə nærmama me i sāməme nærpwīnien mirəhar nəha harəpwəh nousi əpuneien irəha, irəha həkəpwəh mhə kumwesən eikuə me nəha həno ia rəginraha. Irəha kamhəmwur pen a mamhəfwaki pen m næremhə me mine nənimwi nari me sāməme kīno ia kəruətərei mine nei, kīno mwi ia aean me i kol, silva, mine pras. Irəha nənimwi nari me a. Həkətoni mhə nari, mhəkregi mhə nari, mhəkavən mhə. 21 Nærmama me i həkəpwəh mhə noien ərəha me nepwīn mwi səvənraha. Mætə kamhəmwur pen a mamhousi əpune nærmama, mamho nahak mine noien səvəi klepa, mamhakres, irəha nærman mine nīpran kamhəiri əpnəpen irəha me.

10

Agelo sə rauvehi kwəti nīmwai nəkukuə riti kīnərfe

1 Nənə iakətoni agelo riti mwi nəgsen rasori rukrutə ia neiai meiwaiu pehe. Nəpuə riti ruvegi nīpwrən. Mərarən riti rukuraukurau ia kənkəpwə. Nənimen raməhiapw rəmwhen ia meri. Nīsun mi krouəmwhen ia pos asori mi krauuək. 2 Kwəti nīmwai nəkukuə riti sə kīnərfe raməmak ia rəgin. In ruvi atukw i, mərpwi pəri nīsun mi mwatuk ia təsi nənə nīkaren mour ia tīprənə, 3 marə məkwein əpwəmwīs, rerīn rəmwhen ia laeon sə ramasək asori. Nəpīn rəkwein iamīnhi, karuəruə rərkwəpahar m sefen. 4 *Karūəruə rərkwəpahar raka m sefen,

* **9:20:** Rev 16:9,11, Aes 2:8,20, 1Kor 10:19-20, Sam 115:4-7, Sam 135:15-17, Dan 5:23 * **10:4:** Dan 8:26, Dan 12:4,9

iakəpnəpenə mə takrai pen ia nəkukuə nəgkiariien sə rani, mətə iakregi reri iərmama riti rukrutə ia neiai mamini mə, “Ərkwafə ia nəgkiariien i karuəruə rani, məpwəh nīrai penien ia nəkukuə.”

⁵ *Nənə agelo sə iakətoni ramərer pen ia təsi mine tiprənə ruvehi utə rəgīn mwatuk mahatən pen fwe ia neiai, ⁶ *mīni mə, “Kumwesən ramarə ia nuk nuk me. In rino neiai, tiprənə, təsi, mine narimnari me pam səməme kamharə ia nīrəhar. Iakani kwəsuaħi ia nəghīn mə nəpīn ruvəkwaħwa. Kumwesən ko rīpkəfwini mhə mwi, ⁷ *mətə nəpīn agelo sə ro sefen irə trəse kisīpw səvənhi, nəgkiariien nəha Kumwesən rīnərkwafə nīpwran truvehe mukuə rosi in rīməni pen ti iotukwininari me səvənhi profet kupwən me.”

⁸ Nənə iakregi mwi reri iərmama nəha ruku pen ia neiai mani pehe tukw iou i mə, “Evən muvehi nīmwai nəkukuə nəha sə kīnərfe raməmāk ia rəgi agelo nəha ramərer pen ia təsi mine tiprənə.”

⁹ *Ro iamīnhi irə iakevən mərəs pen agelo nəha mə truvei pehe miou nīmwai nəkukuə ouihi nəha sə kīnərfe. In rini pehe tukw iou i mə, “Tikuvehi məni. Trouaha tipwīm, mətə ia nəkwam tikregi rəsien rəmwhen ia sukapak.” ¹⁰ Nənə iakuvehi raka nīmwai nəkukuə ouihi nəha sə kīnərfe ia rəgi agelo, məni. Iakaməni mīregi ia nəkwak rəsien rəmwhen ia sukapak, mətə nəpīn iakətīgai pam, nənə iakregi tipwīk ruvehe mərəha. ¹¹ Nənə kīni pehe tukw iou i mə, “Tikaməkeikei məkīari mwi rəmwhen ia profet, mīni irapw nəfe

* **10:5:** Dut 32:40, Dan 12:7

* **10:6:** Neh 9:6, Sam 146:6

* **10:7:** Dan 9:6,10, Amos 3:7

* **10:9:** Esik 2:8, 3:1-3

treste nǝrmama hǝpik, nǝrmama ia teki nǝrmama sǝpǝmsǝpǝ, mine kwǝnǝkwus me sǝpǝmsǝpǝ, mine nǝgkiariien me sǝpǝmsǝpǝ, mine kig me.”

11

Iǝmǝ mi kǝru krouǝrer irapw ti nǝgkiariien pǝrhien

¹ *Ia nǝpǝn nǝha kuvei pehe nari riti miou rǝmwhen ia nig kauvehi mak sǝvǝi nari irǝ, nǝnǝ kini pehe tukw iou i mǝ, “Evǝn muvehi mak sǝvǝi nimwǝ sǝvǝi Kumwesǝn mine nifata sǝvǝnhi, mǝvsini nǝrmama sǝmǝme kamhǝfwaki fwe ikin. ² *Mǝtǝ tikǝpwǝh nuvehien mak ia nikare nimwǝ nǝha iruǝ. Tikǝpwǝh nuvehien mak sǝvǝnhi, ti nǝri nǝ mǝ kuvǝuvei pen raka kwopun nǝha m nǝrmama hǝreirei Kumwesǝn,^a nǝnǝ irǝha tuheivǝ testesi taon ikinan sǝvǝnhi meste mǝkwǝ foti-tu.” ³ Iou takǝrhi pen iǝrman mi kǝru sǝiou sǝmǝmi krouǝrer irapw tukw iou. Iǝmǝ mi nǝha trouarkahu tinari sǝ rahatǝn pen mǝ krauasǝk ti nǝrǝhien, nǝnǝ rouarǝ rouǝvisau irapw nǝgkiariien sǝ takuvei pen minrau meste nǝpǝn irǝha pam wan-taosen tu-hantret-sikisti. ⁴ *Irau nǝha nukune nei mi olif, mine nǝri mi laet ramǝkure utǝ ia nirau sǝmǝmi krouǝrer ia nǝmri Kumwesǝn Iǝrimǝnu sǝvǝi tiprǝnǝ. ⁵ *Trini minuǝ iǝrmama riti ramǝmwur mǝ trouaha irau, nǝnǝ nǝrami napw truku pen ia nipǝgi nǝkwanrau

* **11:1:** Esik 40:3, Sek 2:1-2 * **11:2:** Luk 21:24, Rev 12:6, 13:5

a 11:2: Nǝrmama hǝreirei Kumwesǝn. Suatuk riti mwi ti ninien nǝgkiariien nǝha in i mǝ “Nǝrmama ia tǝnǝmtǝnǝ me” uǝ “Nǝrmama ripko mhǝ irǝha nǝkur Isrel.” * **11:4:** Sek 4:3,11-14 * **11:5:** 2Saml 22:9, 2King 1:10, Sam 97:3, Jer 5:14

mier mahi əpune nərmama səməme haməmwəki irau. Iərmama sə raməmwur mə trouraha irau traməkeikei memhə iaminha irə. ⁶ *Iəmə mi nəha krauvehi niskaiien ti nəsisəgien ia nəpuə mə nesən trəpwəh nauərien nəpın irau krauni irapw nəgkiariien me səvəi Kumwesən. Irau krauvehi mwi niskaiien ti nuvsiniien nui me həuvehe mho netə ia nırəha, nənə rouukurən mwi nuvehi peheien nemhəien me səpəmsəpə həuvehe mhouraha nərmama ia təkure tıprənə i. Irau krouukurən noien narimnari me nəha ia nəpın me a rəmwhen mə irau kraoukeikei.

⁷ *Nəpın irau krouni irapw pam raka nəgkiariien səvənrau, nənə nərimiru fwe ia nıpəg sə rameiwaiu nukunen riwən, in trukrirapw mutə maruagən mınrau, muvehi irapw niskaiien səvənrau, mousi əpune irau. ⁸ *Nıpwranrau mi trouəmak ia suatuk səvəi taon asori nəha, kwopun nəha kınəruı tərini pen Iərimənu səvənrau ia nei kamarkuauı ikin. Kıməuvsini nəghi taon nəha kini mə “Sotom” uə “Ijip” ramahatən pen nərəhaien ia kwopun nəha. ⁹ Nənə nərmama səməme haməuku pen ia teki nərmama me səpəmsəpə, mine nəgkiariien me səpəmsəpə, mine kwənəkwus me səpəmsəpə, tuhəspau ia nıpwranrau meste nəpın kahar mine nıpərin, nənə, kıpəsəni mhə nıpwranrau mə tukinimwi. ¹⁰ Nərmama me ia təkure tıprənə tuhəgien pəri, mho lafet, mhəriari pen narimnari amasan me mınraha me, ti nəri nə mə profet kəru nəha səməmi krino nəmisəien asori m nərmama ia təkure tıprənə krouvamhə.

* **11:6:** 1King 17:1, Eks 7:17-20, 1Saml 4:8 * **11:7:** Dan 7:21,

Rev 12:17, Rev 13:1,7, 17:8 * **11:8:** Luk 13:34

11 *Mətə nəpɪn kahar mɪne nɪpərɪn ruvehe mukurau, nənə iakətoni Kumwesən ruvei pen nimiruien mɪnrau kroueiahag mwi rouərer ia nisunrau. Nənə nərmama me pam səməme hətoni irau həhekɪr asori. 12 *Nənə irəha həregi reri iərmama riti rupwinari ruku pen ia neiai mɪni pen tɪ nirau i mə, “Rouutə pehe i.” Nənə nəpuə riti ruvehi irau mutə mevən ia neiai. Nərmama səməme kamhəm wəki irau kamhərer mamhətoni irau krautə.

13 *Ia nəpɪn nəha təkwtək wuni a mwi nɪmwɪnɪmwɪen asori riti ravən, makɪə fɪfi nari ia kwopun kuatia ia taon nəha, məpwəh kwopun naen hamasan. Nɪmwɪnɪmwɪen ravən nərmama sefen taosen hemhə. Nərmama me pam səməme həpkemhə mhə həhekɪr mhətəmnɪmwɪn, mhəuvehi utə nəghi Kumwesən sə ramarə ia neiai.

14 *Aueh, nərəhaien sə ro kəru irə ruvehe muvavən! Mətə aueh, hətə ro, nərəhaien sə ro kahar irə tɪpko mhə tui ruvehe!

Agelo sə ro sefen irə rəse kisɪpw səvənhi

15 *Agelo sə ro sefen irə rəse kisɪpw səvənhi, nənə iakregi nərmama nepwɪn fwe ia neiai kamhəgkiari rerɪnraha rupwinari mamhəni mə, “Nərimənuien kamərimənu irə ia təkure tɪprənə i təkwtək wuni ruvehe məmak ia rəgi Kumwesən səkitaha mɪne Kristo səvənhi. Nənə in trərimənu ia nuk nuk me.”

16 *Nənə nəmə asori me nəha twenti-fo səməme kamhəkure ia jea me səvənraha ia nəmri

* 11:11: Esik 37:5,10 * 11:12: 2King 2:11 * 11:13: Rev 8:5, 16:18 * 11:14: Rev 9:12 * 11:15: Eks 15:18, Sam 10:16, Dan 2:44, Obad 21 * 11:16: Rev 4:4,10

Kumwesən hənimwi nukurhunraha mheiwaiu,
mhəuvei pen nisaiien səvənraha revən tukwe,
17 *mamhəni mə,

“İərimənu Kumwesən sə rauvehi niskaiien me
pam.

Ik ikinarə fwe kupwən muvehe meste mwi
ipwet mine.

Kimaha iahaməni tanak tukw ik,
ti nəri nə mə ikiməuvehi niskaiien asori səim,
nənə minamərimənu nəha təkwtəkwuni.

18 *Nərmama ia tənəmtənə me niemaha rəpi pik
irəha,
mətə niemaha asori səim ruvəuvehe.

Rino nəpən səim tikəkiri nərmama səməme
həuvamhə,
mərəku pen səim iotukwininari me, profet me
mine nəkur ikinan me, mine nərmama me
pam səməme kamhəsiai nəghim,
nəri auər a mə irəha kamhəuvehi nasorijen uə
həpkuvehi mhə nasorijen.

Nənə rino nəpən səim tikouraha nərmama me
nəha səməme kamhouraha nari ia təkure
tiprənə.”

19 *İa nəpən nəha kəsevər ia nimwə səvəi
Kumwesən fwe irənhə ia neiai. İa nəkwai nimwə
nəha kətoni pokis səvəi nəgkiariien i Kumwesən
rinərihi tərini əknekən. Nənə nouapirien rəhiapw,
karuəruə rərkwəpahar, kregi nərkərikien,
nimwnimwien ravən, aes rəsas rəmwhen ia nesən
asori.

* **11:17:** Rev 1:4,8, 15:3
10:7, 19:5, Sam 115:13

* **11:18:** Sam 2:1, 46:6, Rom 2:5, Rev
* **11:19:** Hip 9:4, Rev 8:5, 15:5, Rev 16:21

12

Pran riti mine snek asori riti

¹ Nənə kətoni nīmtətien asori riti rier irapw fwe ia nīmagouagou. Pran riti rarkahu ia meri rəmwhen ia tīnari səvənhi, mərpwi utə nīsun mi ia məkwə, nənə məfəfau ia kəfəfau riti səvəi nīsiaiien kīno pen kəməhau twelef irə. ²*Prən nəha ramregi nəmīsaiien mamasək əpwəmwis ti nəri nə mə rīno tīpwīn na trərəhi tīni. ³*Nənə nīmtətien riti mwi rier irapw ia nīmagouagou. Iakətə snek asori riti rəruerəv. Kənkəpwə irəha pam sefen. Kənkəpati irəha pam ten. Nənə kəfəfau pen kəfəfau səvəi nīsiaiien ia kənkəpwə me. ⁴ Nīpikīn reiesi raka kuse kəməhau riti məpwəh kusen kəru. Səməme nəha nīpikīn reiesi raka irəha həsas ia təkure tīprənə. Nənə snek asori nəha revən mərəer kupwən ia pran nəha na trərəhi iəkunouihi mə nəpīn tīni trətui snek asori nəha trəni. ⁵*Prən nəha rərəhi tīni iərman. In iərman sə truvehi nəri skai rəmwhen ia nep ramahatən pen nasoriien səvəi kīg, rauvehi mamərimənu ia nərmama ia tənəmtənə me pam. Nəpīn tīni prən nəha rīnətui raka, nənə Kumwesən ruvehi in, muvehi utə irənhə ia jea səvənhi mə trərimənu. ⁶*Nənə prən nəha rap mevən fwe kwopun akwesakwes. Kwopun riti fwe ikin Kumwesən rīnəpnəpenə raka ti prən nəha mə trarə ikin. Tukətui amasan tukwe ia kwopun nəha keste nəpīn wan-taosen tu-hantret-sikisti.

⁷*Nənə naruagənien riti rīskəmter fwe ia neiai. Mikael mine nagelo me səvənhi kənamhousi snek

* **12:2:** Maeka 4:10 * **12:3:** Dan 7:7 * **12:5:** Sam 2:9, Rev 19:15 * **12:6:** Rev 11:2-3 * **12:7:** Jut 9

asori, nənə snek asori mine nagelo me səvənhi kənamhousi mwi irəha. ⁸Mətə Mikael mine nagelo me səvənhi həuvehi irapw niskaiien səvəi snek asori. Kwopun riti səvənraha riwən mwi fwe ia neiai. ⁹*Kuvehi snek asori nəha kərarki irapw pehe ia təkure tɪprənə. In snek tui kani mə ləremhə uə Setan sə rameikuə ia nərmama ia tənəmtənə me pam. Kərarki irapw in irəha nagelo me səvənhi heiwaiu ia təkure tɪprənə.

¹⁰*Nənə iakregi iərmama riti fwe ia neiai rerin rupwinari, mini mə,

“Təkwtəkhwuni nəha Kumwesən səkitaha truve-
himiru kitaha!

Təkwtəkhwuni nəha in tro sətōni mə in rauvehi
niskaiien, nənə, təkwtəkhwuni nəha in
ramərimənu!

Nənə təkwtəkhwuni nəha Kristo səvənhi tro sətōni
mə in rasori ia narimnari me pam!

Ro iamɪnhi irə ti nəri nə mə Setan sə rani ərəha
piəvtaha me ia nəpɪn mine ia ran ia nəmri
Kumwesən,

kinərarki irapw in ia neiai.

¹¹Piəvtaha me hənaruagən raka irəha min,
mhəuvehi irapw niskaiien səvənhi ia nite
kwəti sipsip,

mhəuvehi irapw mwi niskaiien səvənhi ti nəri
nə mə həni irapw nəgkiariien pərhiēn.

Irəha həkokeikei pɪk mhə nimiruiēn
səvənraha,

mətə hənərer mwatuk a ti nemhəiēn.

¹²*Ro iamɪnhi irə, ik neiai mine nərmama səməme
kamharə ia niram tiho mhaġien!

* **12:9:** Jen 3:1,14, Luk 10:18, 22:31, Rev 20:2 * **12:10:** Job 1:11,

Sek 3:1 * **12:12:** Aes 44:23, Aes 49:13

Mətə aueh ik tìprənə mine təsi! Tirouregi rərəha anan tì nəri nə mə Setan rineiwaiu pehe tukumirau!

Niemaha raməpi pik in tì nəri nə mə rukurən mə nəpìn səvənhi ruvəkwa.

¹³ Nəpìn snek asori nəha rətoni mə kinərarki irapw in ia təkure tìprənə, nənə rinaripwi prən nəha sə rìnərəhi tini iərman. ¹⁴ *Mətə kuvei pen tərəgi mīrup kəru m prən nəha mə trivə irə mevən fwe imwəni ia kwopun akwesakwes. Tukamətui amasan tukwe ia kwopun nəha keste nuk kahar mine nìpərìn mə snek asori trəpwəh nourahaien in. ¹⁵ Snek asori nəha rīruai nui asori riti ia tərhun rəmwhen ia iapiwən mə trukurirə pen prən nəha, muvehi map. ¹⁶ Mətə tìprənə rasitu ia pran nəha, meitehi, mətigai pam nui sə snek asori ruvəruai irə ia tərhun. ¹⁷ *Ro pen snek asori niemaha rəpi anan tì pran nəha. In rəpwəh in mevən mə traruagən irəha kwənəkwas me nepwìn səvənhi. Irəha nəha nərmana səməme kamho nəgkiariien me səvəi Kumwesən mine nəgkiariien Iesu rīmāni irapw mə ro nìpərhiēnien. ¹⁸ In revən mərəer ia nìkare təsi.

13

Nərimīru riti sə rukrirapw ia reri təsi mutə

¹ *Iakətoni nərimīru riti rukrirapw ia reri təsi mutə. Kənkəpati me irəha pam ten. Kənkəpwə me irəha pam sefen. Nənə kəfəfau pen kəfəfau səvəi nìsiaiien ia kənkəpati me. Kimərāi pen nəhag me ia kənkəpwə me kuatia kuatia, nəhag me

* **12:14:** Dan 7:25, 12:7 * **12:17:** Rev 11:7, 14:12 * **13:1:** Rev 12:3, Rev 17:3, 7-12

səmame kamhəni ərəha Kumwesən. ² *Nərimiru nəha rəmwhen ia pusi asori nəha kani mə lepet. Nisun me həmwwhen ia nərimiru nəha kani mə pea. Nipəgi nəkwān rəmwhen ia nipəgi nəkwai laeon. Nənə snek asori nəha ruvei pen niskaiien səvənhi min. In ruvei pen mwi jea sə in raməkure irə mamərimənu mine nasoriien sə rasori m nərimiru nəha. ³ *Kənkəpwə nərimiru nəha riti iakətoni mə kinəpi əpune raka, mətə rarə mimiru mwi təmwiki nau ruvehe minamə. Nərmama me pam ia təkure tīprənə nənimenraha rier tukwe, nənə həkurirə nərimiru nəha. ⁴ Irəha pam hənimwi nukurhunraha ia nəmri snek asori, mhəsiai in, ti nəri nə mə in ruvei pen nasoriien səvənhi m nərimiru nəha. Irəha hənimwi mwi nukurhunraha ia nəmri nərimiru nəha, mhəsiai in, mhəni mə, “Sin rəmwhen ia nərimiru nəha? Sin rukurən naruağənien irau min?”

⁵ *Kinəsəni nərimiru nəha minuə trəgkiari ərpwi mini ərəha Kumwesən. Kiməuvei pen nasoriien min in rukurən noien nəfe nəghin in rokeikei mə tro meste məkwə foti-tu. ⁶ In rani ərəha pik Kumwesən, mine nəghin, mine imwəni fwe ia neiai, mine nərmama səməme kamharə ikin. ⁷ *Kinəsəni in mə traruəğən irəha nərmama me səvəi Kumwesən muvehi irapw niskaiien səvənraha. Nənə kiməuvei pen mwi nasoriien min mə trərimənu ia nərmama me pam, nərmama səvəi kwənəkwus me pam, mine teki nərmama me pam, mine nəgkiariien me pam, mine tənəmtənə me pam.

* **13:2:** Dan 7:4-6 * **13:3:** Rev 17:8 * **13:5:** Dan 7:8,25, Dan 11:36, Rev 11:2 * **13:7:** Rev 11:7

⁸ *Nərmama me pam ia təkure tɪprənə səməme nəghinraha riwən ia nəkukuə səvəi nɪmɪruien tuhənɪmwi nukurhunraha ia nəmri nərimɪru nəha mhəsiai in. Fwe tui nəpɪn tɪprənə ramiwən ihi kuvərai pen raka nəghi nərmama ia nəkukuə nəha səvəi kwəti sipsip sə kinousi əpune.

⁹ Iərmama sə nəkwəregɪn rarə traməkeikei mətəriɡ amasan.

¹⁰ *Iərmama sə kimərɪfi mə trevən ia kalapus traməkeikei mevən.

Iərmama sə kimərɪfi mə tukərai əpune ia nau səvəi naruagənien, tukaməkeikei kərai əpune.

Ti nəri nə mə tro iamɪnhi irə mɪne ro pen nərmama me səvəi Kumwesən tuhaməkeikei mhərer əknekɪn ia nahatətəien səvənraha ia nəpɪn me.

Nərimɪru riti sə rukrirapw ia reri tɪprənə mutə

¹¹ Nənə iakətoni mwi nərimɪru riti mwi rukrirapw ia reri tɪprənə mutə. Kənkəpati kəru krouəmwhen ia kwəti sipsip riti. Rəɡkiari rerɪn rəmwhen ia snek asori riti. ¹² Nərimɪru sə rɪməkupwən muvehe ruvei pen nasorien me pam səvənhi min. Ramərer ia nəmri nərimɪru sə rɪməkupwən muvehe, maməkeikei m nərmama me pam ia təkure tɪprənə mə tuhənɪmwi nukurhunraha ia nənimen mhəsiai nərimɪru sə rɪməkupwən muvehe kɪnəpi əpune kənkəpəwə riti mətə rarə mɪmɪru mwi təmwiki nau ruvehe mɪnamə. ¹³ *Nərimɪru sə rɪməkurirə muvehe ramo nɪmtətien asori me, mɪni napw rukrutə ia

* **13:8:** Sam 69:28, Rev 3:5, 5:6, Rev 17:8, Rev 20:12,15, Rev 21:27

* **13:10:** Jer 15:2, 43:11, Mat 26:52, Rev 14:12 * **13:13:** Mat 24:24, 1King 18:24-39

neiai meiwaiu pehe ia tiprənə ia nəmri nərmama.

14 *In ramərer ia nəmri nərımıru sə rıməkupwən muvehe mamō nımtətien me kınəsəni pen in mə tro. Ia noien nəha in reikuə ia nərmama me səməme kamharə ia təkure tiprənə mamıni pen ti nırəha i mınuə tuhaməkeikei mhəuvrhəkin nari riti mhəuvnhi nərımıru sə kınəpi əpune in ia nau mətə rarə mımıru mwi.

15 *Nənə nəri nəha kıməuvnhi nərımıru nəha irə kəsəni nərımıru sə rıməkurirə muvehe mə treiahag pen irə pwəh rəgkiari. Nənə nənımwi nari nəha rəgkiari skai mını mə tukaməkeikei kousi əpune nərmama me pam səməme həpkinımwi mhə nukurhunraha ia nənimen mhəsiai in.

16 Nənə in raməkeikei m nərmama me pam, nərmama kamhəuvehi nasoriien mıne nərmama həpkuvehi mhə nasoriien, nərmama nautə səvənraha rasori mıne nərmama nautə səvənraha riwən, nərmama kamoslef ia nırəha mıne nərmama kıpko mhə slef ia nırəha. In raməkeikei mınraha mə tuhəuvehi mak riti ia rəginraha mwatuk uə ia nıpwənanraha.

17 *Mak nəha in nəha nəghi nərımıru nəha uə nampa sə ramahatən nəghin. Trini mınuə iərmama riti mak nəha riwən irə, ko rıpkuvehi mhə nəmri nari riti, məpwəh nəmri penien nəmri nari ia nari riti.

18 Ro iamınhi irə tikaməkeikei mo nukurənien səim rəpwəmwis mwi ti nukurənien nampa səvəi nərımıru nəha. Nənə trini mınuə nukurənien səim rəmwhen tikukurən nınıien nıpwran. Nampa nəha sikis-hantret-sikisti-sikis, ramahatən iərmama riti.

* **13:14:** Dut 13:1,4, Rev 19:20 * **13:15:** Dan 3:4-6 * **13:17:** Rev 14:9,11, Rev 16:2, 19:20, Rev 20:4

14

Kwæti sipsip mine sǽvǽnhi nǽrmama me irǽha pam 144,000

¹ *Nǽnǽ iakæti pen fwe ia tǽkuær Saeon, mǽtoni kwæti sipsip ramǽrer ia tǽkuren, nǽrmama wan-hantret-foti-fo-taosen kamhǽrer irǽha min. Kimǽrai pen nǽghi kwæti sipsip mine Tata sǽvǽnhi ia nipwǽnanraha. ² *Nǽnǽ iakregi reri iǽrmama riti fwe ia nei ai ramǽgkiari, rerin rǽmwhen ia nui sǽ ramivǽ mamierig, mǽmwhen mwi ia karuæruǽ ramǽrkwǽpahar asori. Reri iǽrmama nǽha iakregi rǽmwhen ia nǽrmama me i kamhǽuæsi nǽri kauæsi kamæni nipu irǽ. ³ *Irǽha kamhǽrer kupwǽn ia jea sǽ Kumwesǽn ramǽkure irǽ mamǽrimǽnu ipaka ti nǽrimiru me nǽha kefǽ mine nǽmǽ asori me nǽha twenti-fo, mamhani nipu vi riti. Iǽrmama riti ripkukurǽn mhǽ nipu nǽha, nǽrmama me a nǽha irǽha wan-hantret-foti-fo-taosen sǽmǽme Kumwesǽn rifi nari ia nirǽha mipeki raka irǽha ia tǽkure tiprǽnǽ, irǽha hǽukurǽn. ⁴ *Irǽha i nǽrmama me i sǽmǽme hǽnatuakǽm amasan, mhǽmher, ti nǽri nǽ mǽ hǽpkiri raka mhǽ pran. Irǽha nǽrmama vi a. Irǽha kamhǽkurirǽ kwæti sipsip mamhǽuvǽn ia kwopun me pam in ramevǽn ikin. Nǽrmama me pam, mǽtǽ kif i nari ia nirǽha i, kipeki raka irǽha hǽmwhen ia kwǽnkwai nei kukupwǽn kesi kuvehi pen m Kumwesǽn mine kwæti sipsip. ⁵ *Nǽnǽ ia tǽrhunraha kipkætǽ mhǽ neikuæien riti ti nǽri nǽ mǽ irǽha hatukwatukw pam.

* **14:1:** Rev 3:12, 7:3,4 * **14:2:** Esik 1:24, 43:2, Rev 1:15, 19:6

* **14:3:** Sam 149:1, Aes 42:10, Rev 5:9, 7:4 * **14:4:** Efes 5:27

* **14:5:** Sam 32:2, Sef 3:13

Nagelo me kahar

⁶ Nənə iakətoni mwi agelo riti mwi ramivə irənhə ia nimagouagou mauvehi nəgkiariien amasan riti sə ramarə rerin trəvisau irapw i m nərmama səməme kamharə ia təkure tīprənə, nərmama səvəi tənəmtənə me pam, mine kwənəkʷus me pam, mine nəgkiariien me pam, mine teki nərmama me pam. ⁷ *In rəgkiari rerin rupwinari mini mə, “Həsiai Kumwesən, mhəgnəgini in, ti nəri nə mə nəpin atukwatukw səvənhi ruvəuvehe mə trərpwin noien me səvəi nərmama. In rino neiai mine tīprənə mine təsi mine nəmri nui me. Kimiaha tihaməkeikei mhənimwi nukurhumiaha me ia nənimen mhəsiai in.”

⁸ *Agelo riti sə ro kəru irə rukurirə mwi agelo nəha, muvehe, mamini mə, “In ruvəmwei! Taon asori nəha Papilon ruvəmwei! Taon nəha rəmwhen ia pran riti səvəi suatuk rivi nərmama ia tənəmtənə me pam həuvehe mhənimwi waen irəha min. Waen nəha sənmwın in nə noien ərəha sə nərman me kamho irəha min.”

⁹ *Nənə agelo riti mwi sə ro kahar irə, rukurirə pen mwi irau, rini nəgkiariien i rerin rupwinari mə, “Trini minuə iərmama riti rinimwi nukurhun mi ia nəmri nərimiru mine nəri kuvrhəkin kuvnhi nərimiru irə, misiai in, muvehi mak səvənhi ia nipwənan uə rəgin, ¹⁰ *niemaha səvəi Kumwesən treste in. Niemaha nəha rəmwhen ia waen riti sə riskai pik Kumwesən ruvi pen ia kap səvənhi muvehi pen m iərmama nəha rənimwi. Nənə in triregi

* **14:7:** Rev 10:6 * **14:8:** Aes 21:9, Jer 51:7,8, Rev 17:2, 18:2,3

* **14:9:** Rev 13:12-17 * **14:10:** Jen 19:24, Sam 11:6, 75:8, Aes 51:17,22, Jer 25:15, Esik 38:22, Rev 15:7, 16:19, Rev 19:20, 20:10, Rev 21:8

nəmisəien ia napw mine təpisi ərəha, trouahi in ia nəmri nagelo ikinan me mine kwəti sipsip.

11 *Nise napw sə ramo nəmisəien minraha rautə ia nuk nuk me. Nərmama me i səməme hənimwi nukurhunraha ia nəmri nərimiru, mhənimwi mwi nukurhunraha ia nəmri nəri kuvrhəkin kuvnhi nərimiru irə, mhəsiai in, uə sin nəghin ruvehi mak sə rahatən nəghi nərimiru, irəha tuhəregi nəmisəien ia nəpin mine ia ran mhəpwəh napwisien.” 12 *Ti nəri nə mə tro iamihhi irə mine ro pen nərmama me i səvəi Kumwesən kamho nəgkiariien me səvənhi, nənə mamhahatətə ia Iesu, tuhaməkeikei mhərer əknekən ia nəpin me.

13 *Nənə iakregi reri iərmama riti ruku pen ia neiai mini mə, “Rai pen nəgkiariien i ia nəkukuə: Ipwet mine mamevən trinini minuə nərmama me səvəi Iərimənu hemhə rerinraha tragien.”

Nənə Nənimwin Ikinan rini mə, “Ouəh pərhien. Irəha tuhapwis mhəpwəh mwi nəmwurien ti nəri nə mə noien amasan me səvənraha tuhəkurirə pen irəha.”

Kumwesən treivə testesi nərmama rəmwhen kamo ia tipwe krep sə rimarei

14 *Iakəti pen mətoni mwi nəpuə riti rəpsan nənə iərmama riti raməkure utə ia nəpuə nəha. Iərmama nəha rəmwhen ia iəməti iərmama riti. In raməfəfau ia kəfəfau səvəi nisaiien kino ia kol, mauvehi nau ikou riti rəhia. 15 *Nənə agelo riti mwi rier ia nimwə səvəi Kumwesən, maməkwein əpwəmwis iərmama nəha raməkure utə ia nəpuə

* 14:11: Aes 34:10, Rev 13:12-17, Rev 19:3

13:10 * 14:13: 1Kor 15:58, Hip 4:10

* 14:15: Joel 3:13

* 14:12: Rev 12:17,

* 14:14: Dan 7:13

mamini mə, “Uvehi nau ikou səim, mərai raka nərmama ia təkure tıprənə. Nəpın tukərai raka irəha irə ruvəuvehe ti nəri nə mə irəha həmwən ia nəveginien sə ruvəmruə ia nəmhien.” ¹⁶ Ro iamınhi irə iərmama sə raməkure utə ia nəpuə ruini pen nau ikou səvənhi ia təkure tıprənə, mərai raka nərmama ia təkure tıprənə rəmwən kamo ia nəveginien sə ruvəmruə ia nəmhien. ¹⁷ Agelo riti mwi rier ia nimwə səvəi Kumwesən fwe ia neiai, mauvehi mwi nau ikou riti səvənhi rəhiə. ¹⁸ *Nənə agelo riti mwi rier, in agelo sə ramətui ti napw ia təkure nıfatə. In rier məkwein əpwəmwis agelo sə rauvehi nau ikou mını mə, “Uvehi nau ikou səim, mərai raka nərmama ia təkure tıprənə rəmwən kamo ia tıpwə krep sə rımarei.” ¹⁹ Ro iamınhi irə agelo nəha ruini pen nau ikou səvənhi ia təkure tıprənə, mərai raka nərmama ia təkure tıprənə rəmwən kamo ia tıpwə krep sə rımarei, nənə mərarki pen irəha ia kwopun asori riti. Tukeivə testesi irəha ikın rəmwən kamo ia tıpwə krep sə rımarei mə nisen traris. Kwopun nəha iruə ia taon, kwopun sə Kumwesən truvehi irapw niemaha səvənhi ikın. ²⁰ *Nənə keivə testesi nərmama me nəha rəmwən kamo ia tıpwə krep sə rımarei mə nisen traris. Nıtenraha rier ia kwopun nəha maiu meste nari fwe tri-hantret kilometa. Ko hos ravən irə netə nəha rutə meste tərhun.

15

Nagelo irəha sefen kamhəuvehi nərpwinien irəha sefen

* **14:18:** Joel 3:13 * **14:20:** Aes 63:3, Krae 1:15, Rev 19:15

¹ *Iakəti pen fwe ia neiai mətoni mwi nımtätien riti mwi rasori iakərkərinari irə. Nagelo irəha sefen kamhəuvehi nərpwınien me irəha sefen. Nərpwınien me nəha irəha sampam ti nəri nə mə nəpın tuhəier pam nənə niemaha səvəi Kumwesən riwən. ² *Nənə iakətoni nari riti rəmwhen ia təsi kınə ia klas ko kərapi irə irau napw. Iakətoni mwi nərmmama nepwın kamhərer ia nıkarkare təsi nəha. Nərmmama me nəha hənəpwəh nəsenien nərımıru mınə nəri kuvrhəkin kuvnhi nərımıru irə mınə nampa sə ramahatən nəghın mə tra-sori ia nırəha. Irəha kamhərer ia nıkarkare təsi kınə ia klas. Ia rəginraha kamhəuvehi nəri kauəsi kaməni nıpu irə Kumwesən rıməuvei pen mınraha. ³ *Irəha kamhani nıpu səvəi Moses iərmama sə ro tukwini nari m Kumwesən, mınə nıpu səvəi kwəti sipsip, mamhani mə,
 “Iərimənu Kumwesən sə ikəuvehi nıskaiien me pam,
 narımınari me səməme ikamo hasori kətoni kamərkərinari irə!
 Ik kig sə ikamərimənu ia tənəmtənə me,
 suatuk me səim ikamesi pen suatuk me səvəi natukwatukwien mınə nıpərhienien!
⁴ *Nərmmama me pam tuhaməkeikei mhəsiai ik,
 mhəuvehi utə nəghım,
 ti nəri nə mə ik əpa İəmə ikinan.
 Nərmmama ia tənəmtənə me pam tuhəuvehe
 mhənımwi nukurhunraha ia nənimem
 mhəsiai ik

* **15:1:** Lev 26:21, Rev 15:6-7 * **15:2:** Rev 4:6, 5:8 * **15:3:** Eks 15:1, Rev 11:17, 16:7, Sam 92:5, Sam 139:14, Sam 145:17 * **15:4:** Jer 10:6-7, Sam 86:9

ti nəri nə mə ikino raka noien atukwatukw me səim nərmama hənətoni.”

5 *Irəha hani raka nīpu nəha, nənə iakəti pen mətoni kəsevər ia kwopun ikinan anan ia nəkwai nimwə tapolen fwe ia neiai. 6 *Nagelo me nəha irəha sefen həier ia nimwə tapolen nəha, mamhəpeki nərpwiniēn me nəha sefen. Tinari səvənraha kīno ia linen sə rəpsan mamser. Həkwani nari kīno ia kol rukurau ia kwənpwenhinraha. 7 *Nənə nərīmīru me nəha kefə riti rīpeki pen pesin me səməme kīno ia kol muvei pen kuatia kuatia m nagelo me nəha sefen. Pesin me nəha həukuər ia niemaha səvəi Kumwesən, Kumwesən sə ramarə ia nuk nuk me. 8 *Ia nəpīn nəha nimwə tapolen ruvehe mukuər ia nise napw, ti nəri nə mə Kumwesən ramarə ikīn, mamser, mamō nəgsen. Iərmama riti ko rīpkuvnimwə mhə ia nimwə nəha meste nərpwiniēn me sefen səməme nagelo sefen kamhəpeki tuho sampam irə.

16

Pesin me irəha sefen həukuər ia niemaha səvəi Kumwesən

1 *Nənə iakregi reri iərmama riti raməgkiari asori fwe ia nimwə səvəi Kumwesən, mamīni pen ti nagelo me nəha sefen mə, “Həuvən mətəgi irapw ia təkure tīprənə pesin me nəha sefen həukuər ia niemaha səvəi Kumwesən.” 2 *Agelo

* 15:5: Eks 38:21 * 15:6: Rev 15:1 * 15:7: Rev 14:10

* 15:8: 1King 8:10-11, Aes 6:4, Esik 44:4 * 16:1: Aes 66:6, Rev

16:17, Sam 69:24, Jer 10:25, Sef 3:8 * 16:2: Eks 9:10, Dut 28:35,

Rev 13:12-17

sə rakupwən revən mətəgi irapw pesin səvənhi ia təkure tīprənə. Nənə nərmama me nəha səməme mak səvəi nərimiru ramarə ia nirəha, mine səməme kamhənimwi nukurhunraha ia nəmri nəri kiməuvrhəkin kuvnhi nərimiru irə, mamhəsiai in, nīpwrənraha ruvehe mukuər ia nīmwapw me. Nīmwapw me nəha hərəha mamho nəmisəien mīnraha.

³ *Agelo sə ro kəru irə rətəgi irapw pesin səvənhi ia təsi, nənə təsi ruvehe mo netə irə rəmwhen ia nite iərmama ruvamhə, narimnari me kamhəmīru ia reri təsi hemhə pam.

⁴ *Agelo sə ro kahar irə rətəgi irapw pesin səvənhi ia nui aris me mine nəmri nui me, nənə irəha həuvehe mho netə ia nirəha. ⁵⁻⁶ *Nənə iakregi agelo sə ramərimənu ia nui me rini mə, “Kumwesən Ikinan. Ik ikinarə fwe kupwən muvehe meste mwi ipwet mine.

Təkwətəkwuni ikamo noien atukwatukw,
mamərpwīn noien ərəha me i,
mauvei pen netə mīnraha hamənimwi.

In i nərəkuien atukwatukw səvənraha,
ti nəri nə mə irəha hənousi əpune nərmama
me səim mine profet me səim nitenraha
raiu.”

⁷ *Nənə iakregi reri iərmama riti ruku pen ia nifatə ramini mə,
“Ouəh pərhien lərimənu Kumwesən sə ikauvehi
niskaiien me pam,
nəkiriien me səim hatukwatukw mho
nīpərhienien!”

* **16:3:** Eks 7:17-21 * **16:4:** Sam 78:44 * **16:5-6:** Sam 79:3,
Sam 119:137, Aes 49:26, Rev 1:4 * **16:7:** Sam 19:9, Rev 15:3,
16:14, Rev 19:2

8 Nənə agelo sə ro kefə irə rətəgi irapw pesin səvənhi ia meri, nənə Kumwesən rəsəni nukwəsikər mə trənhi nərmama rəmwhən ia napw. 9 *Nəpnəpanien səvəi nukwəsikər rahi irəha, nənə irəha həni ərəha nəghi Kumwesən sə ramərimənu ia nərpwinien me nəha. Irəha həpwəh nırərigien ia noien ərəha me səvənraha, mhəpwəh nuvehi utəien nəghin.

10 *Agelo sə ro krirum irə rətəgi irapw pesin səvənhi ia jea sə nərimiru raməkure irə mamərimənu, nənə kwopun me pam ia nəkwai nitətə sə nərimiru ramərimənu irə həuvehe mhəpitəv pam. Nərmama kamhəregi nəmisəien, mamhahi nəraminraha tukwe. 11 *Irəha kamhəni ərəha Kumwesən fwe ia neiai ti nəmisəien me mine nimwapw me səvənraha, mhəpwəh nırərigien ia noien ərəha me səvənraha.

12 *Nənə agelo sə ro sikis irə rətəgi irapw pesin səvənhi ia nui aris asori nəha nəghin nə İufretes, nənə nui aris nəha ramə, mo suatuk səvəi kig me havən irə mhəuku peraha. 13 Ia nəpin nəha iakətoni nənimwin əmkemik kahar harəmwhən ia frok. Riti rier ia nipəgi nəkwai snek asori, riti rier ia nipəgi nəkwai nərimiru, nənə riti rier ia nipəgi nəkwai profet eikuə. 14 *Nənimwin mirəhar nəha irəhar nəremhə me kamharo nımtətien me. Irəhar harier, mhərevən ti kig me ia tənəmtənə me pam, mharousəsimwin irəha mə tuharuagən ia nəpin asori səvəi Kumwesən, Kumwesən sə rauvehi niskaiien me pam.

* **16:9:** Rev 9:20-21, Rev 16:21

* **16:10:** Eks 10:22, Aes 8:22

* **16:11:** Rev 9:20-21, Rev 16:21

* **16:12:** Aes 11:15, Jer 50:38

* **16:14:** Rev 16:7, Rev 19:6,15,19

15 *“Hæregi ro! Iou iakauvehe rəmwhen ia rakres! Iərmama sə ramətui a məpwəh napriien rerin tragien. Rərəha in ripeci raka tinari səvənhi ti napriien kətoni in ramavən auər a nənə in rauris tukwe.”

16 *Nəremhə mirəhar nəha harousəsımwın pen kig me nəha ia kwopun riti nəgkiariien Hipru rani mə, “Amaketon.”

17 *Agelo sə ro sefen irə rətəgi pen pesin səvənhi ia nimagouagou, nənə iakregi Kumwesən raməgkiari fwe ia nəkwai nimwə səvənhi. Rerın ruku pen ia jea sə in raməkure irə mamərimənu, mamini mə, “In i sampam!” 18 *Nənə nouapirien rəhiapw, karuəruə rərkwəpahar, kregi nərəkərikien, nimwnimwien asori riti ravən. Nimwnimwien nəha rasori pik anan. Fwe Kumwesən rino iərmama ia təkure tiprənə meste pehe nəpın nəha kīpkətoni raka mhə nimwnimwien riti ro iamınhi irə ia nəpın riti.

19 *Nimwnimwien nəha ravən meitehi taon asori nīpərin kahar, nənə taon me ia tənəmtənə me həsas pam. Kumwesən rerin rirhi taon asori nəha Papilon, nənə in ruvehi pen kap riti rukuər ia waen maməkeikei min mə trənimwi pam. Waen nəha in niemaha səvəi Kumwesən rəpi pik in ti taon nəha. 20 *Tənə əmweris me pam hap mhəiwən. Kīpkətoni mhə mwi təkuaər me. 21 *Aes me səməme həmwhen ia kəpwier asori həukrutə ia nimagouagou mhəsas pen ia nərmama. Ko kəkiri

* **16:15:** Rev 3:3,18 * **16:16:** Jaj 5:19, Sek 12:11 * **16:17:**
 Rev 16:1 * **16:18:** Rev 4:5 * **16:19:** Rev 14:10 * **16:20:**
 Rev 6:14 * **16:21:** Eks 9:24, Rev 11:19, Rev 16:9,11

kəpwier me nəha kuation kuation nīpamien səvənhi rəmwhen ia fifti kilo. Nəpīn nərmama hətoni aes me nəha kamhəsas pen ia nīrəha iamīnhi irə, irəha həni ərəha Kumwesən, ti nəri nə mə nərpwīnien nəha in ramo mīnraha rīskai pīk anan.

17

*Taon asori Papilon rəmwhen ia pran səvəi su-
atuk*

¹*Nənə nagelo me nəha sefen kamhəuvehi pesin me nəha sefen riti ia nīrəha ruvehe mīni pehe tukw iou i mə, “Uvehe ro. Prən asori fwe raməkure ia nui me həpīk, iakuə takahatən nərpwīnien səvənhi pwəh ikətoni. Prən nəha in pran səvəi suatuk. ²*Kig me ia təkure tīprənə həno əpnāpen raka nari irəha mīn. Noien ərəha sə prən nəha ramo irəha nərman me rəmwhen ia waen riti. Nərmama ia təkure tīprənə hənənīmwi raka waen nəha mamhakonə irə.”

³*Nənə ia vison nəha Nənīmwin rəriari miou, iakətə agelo nəha ruvehi iou iarouevən fwe ia kwopun akwesakwes ikīn. Ia kwopun nəha iakətoni pran riti raməkure utə ia nərimīru riti. Nərimīru nəha rəruevən pīk kīrai pen nəhag me ia nīpwran me pam. Nəhag me nəha kamhəni ərəha Kumwesən. Nərimīru nəha kənkəpwə sefen, kənkəpati ten. ⁴*Pran nəha tīnari səvənhi rəmwhen ia tihi natis, məruerəv pīk. In ramo pen marəmarə me ia nīpwran, marəmarə me nənimen rutə pīk kīno ia kol mīne kəpwier amasan me mīne

* **17:1:** Jer 51:12-13, Rev 17:15 * **17:2:** Aes 23:17, Rev 14:8

* **17:3:** Rev 13:1 * **17:4:** Jer 51:7, Rev 18:16

perel me. In rauvehi kap riti ia rəgɪn kɪno ia kol. Kap nəha rukuər ia noien me nərman me kamho irəha min hərəha pɪk mhəmkemɪk ia nəmri Kumwesən. ⁵* Ia nɪpwənan kirai pen nəghɪn riti sə nɪpwrən rərkwafə. Rani mə,

TAON ASORI PAPIILON

MAMA SƏVƏI NɪPRAN ME PAM SƏVƏI SUATUK
NUKUNE NOIEN ME PAM SƏMƏME HƏRƏHA PɪK
IA TƏKURE TɪPRƏNƏ

⁶* Nənə iakətoni mə prən nəha rɪnousi əpune nərmama me səvəi Kumwesən mɪne irəha səməme həməni irapw Iesu. Rəmwhen in rɪnənɪmwi nɪtenraha mamakonə irə. Nəpɪn iakətoni prən nəha iakərkəri asori nari irə. ⁷* Mətə agelo rini pehe tukw iou i mə, “Ikamərkərinari iamɪnhi irə ti nəfe? Iou takəusiəre pui pehe nɪpwrai nəri nəha ikamətoni, mo nukurənien i mə sin nəha prən nəha mɪne nəfe nəha nərimɪru nəha in raməkure irə kənkəpwə sefen kənkəpati ten. ⁸* Nərimɪru nəha ikətoni ramɪru fwe kupwən, mətə təkwtəkwni ruvəmhə, tɪpko mhə tui rukrirapw ia nɪpəg sə rameiwaiu nukunen riwən mutə mier mevən kousi əpune. Nərmama kamharə ia təkure tɪprənə səməme kɪpkrai pen raka mhə nəghɪnraha fwe tui nəpɪn tɪprənə ramiwən ihi ia nəkukuə səvəi nɪmɪruien, irəha tuhətoni nərimɪru nəha, nənə həkərinari irə ti nəri nə mə ramɪru fwe kupwən, mətə təkwtəkwni ruvəmhə, nənə tɪpkuvehe mwɪ. ⁹ Iərmama traməkeikei mukurən nari ti nukurənien nɪpwrai nəgkiariien i. Kənkəpwə nərimɪru nəha irəha sefen irəha nə təkue me səməme pran nəha raməkure utə ia nɪrəha. Irəha

* **17:5:** Rev 14:8 * **17:6:** Rev 18:24, 19:2 * **17:7:** Rev 13:1

* **17:8:** Dan 12:1, Rev 11:7, 13:8

mwi kig me. ¹⁰ Kig me irəha krirum həuvəmwei raka, kuatia ramiru nəha təkwtəkwuni mine, nənə riti mwi rəpwəh ihi nuveheien. Nəpın truvehe traməkeikei marə ouihi a. ¹¹ Nərimiru i sə ramiru fwe kupwən, mətə təkwtəkwuni ruvamhə, in mwi in kig riti sə ramo eit irə, mətə in mwi in kig riti səvəi kig me nəha sefen. In trevən kousi əpune in. ¹²* Kənkəpati me nəha ten ikətoni, irəha kig me ten həpwəh ihi nərimənuien, mətə irəha tuhəpkuvehi nasoriien mhərimənu ia nəpın ouihi a irəha nərimiru nəha. ¹³ Nətərigien səvənraha kuatia, nənə irəha tuhəuvei pen niskaiien səvənraha mine nasoriien səvənraha m nərimiru nəha. ¹⁴* Irəha tuharuagən irəha kwəti sipsip, mətə kwəti sipsip truvehi irəpw niskaiien səvənraha ti nəri nə mə in lərimənu sə rasori ia nərimənu me pam, nənə, in Kig sə rasori ia kig me pam. Nərmama me nəha kamhərer irəha min irəha nəha nərmama səməme in rınəkwein irəha, mərpwi rəgın ia nirəha, nərmama səməme in rukurən nətigiteien ia nirəha.”

¹⁵* Nənə agelo rini pehe mwi tukw iou i mə, “Ikətoni nui me nəha pran səvəi suatuk raməkure ia nirəha. Nui me nəha irəha nərmama həpik tekınraha səpəmsəpə, nəgkiariien me səvənraha səpəmsəpə, həuku pen ia kwənəkwas me səpəmsəpə. ¹⁶* Nərimiru nəha mine kənkəpati me nəha ten səməme ikətoni, irəha tuhəmwəki pran səvəi suatuk, mhəpeki raka pam narimnari me səvənhi, mhəpwəh in ramaiu auər a. Irəha tuhani nusan mhəuvani əmwesi in ia napw. ¹⁷ Irəha

* **17:12:** Dan 7:24 * **17:14:** 1Tim 6:15 * **17:15:** Aes 8:7, Jer 47:2 * **17:16:** Rev 18:8

tuho iam̄nhi irə ti nəri nə mə Kumwesən rinəmri
ia nətərigien səvənraha mə tuho rəmwhen sə in
rokeikei. Nətərigien səvənraha truvehe mo kuatia
i, nənə irəha tuhəuvei pen niskaiien səvənraha m
nərimiru mə trərimənu meste nəgkiariien səvəi
Kumwesən ruvehe mukuə. ¹⁸ Prən nəha ikətoni in
taon asori nəha sə ramərimənu ia kig me pam ia
təkure tiprənə.”

18

¹ Kurirə ia narimnari me i, iakətoni agelo riti
mwi rukrutə ia neiai mameiwaiu pehe. In rauvehi
nasoriien sə rasori. Nukuraanien sə ruku pen irə
raməhiəpw̄in pam tiprənə. ² *Rəkwein əpwəmwis
mini mə,

“In ruvəmwei! Taon asori nə Papilon ruvəmwei!

Təkwətəkwuni nəha nəremhə me kamharə
ikin.

In kwopun nənimw̄in ərəha me mine menu
me səməme həkemik kaməmwəki irəha
kamhərkwafə ikin.

³ *Taon nəha rəmwhen ia pran riti səvəi su-
atuk.

Nərmama me pam ia tənəmtənə me hənənimwi
raka waen sənmw̄in.

Waen nəha in noien ərəha sə nərman me
kamho irəha min.

Kig me ia təkure tiprənə həno əpnəpen raka nari
irəha prən nəha.

Nərmama ia təkure tiprənə səməme
kamhəmri pen nəmri nari ia narimnari

irəha nautə səvənraha ruvəuvehe minasori
ruku pen ti noien ərəha me səvəi prən nəha.”

* **18:2:** Rev 14:8, Aes 13:21, Aes 34:11, Jer 50:39

* **18:3:** Rev

4 *Nənə iakregi mwi reri iərmama riti fwe ia neiai rini mə,

“Həier irə nərmama me səiou
 minuə noien ərəha səvənhi trəpwəh nuvehi
 pekiniēn kīmiaha,
 nənə kīmiaha tihəpwəh nuvehien
 nərpwiniēn riti səvənhi.

5 *Noien ərəha me səvənhi rasori rutə ipaka rirapi neiai,
 ro pen Kumwesən rəpwəh nenouenouien
 nərəhaiēn me səvənhi.

6 *Kīmiaha tiho irə rəmwhēn rino ia kīmiaha.
 Narimnari me səməme in rino ia kīmiaha,
 kīmiaha tihaməkeikei mhərpwīn pen m kəru
 min.

In rīməvi pen nənīmwiēn skai kuation ia kap
 səkīmiaha,
 kīmiaha tihaməkeikei mhəvi pen nənīmwiēn
 skai ia kap səvənhi m kəru.

7 *Taon nəha rəmwhēn ia pran riti sə rauvehi utə
 atukw a in,
 mamarə ia narəien sə rukuər ia narimnari
 amasan me.

Ro iamīnhi irə kīmiaha tihaməkeikei mhəuvei pen
 nəmisəien mine nasəkien min rəmwhēn irə.

In rani ia rerin mə,
 ‘Iou prən asori iakaməkure ia kwopun i
 mamərimənu.

Ripko mhə iou pran sə iərman səvənhi ru-
 vamhə.

Ko iapkasək mhə ia nəpīn riti.’

* **18:4:** Aes 48:20, Jer 50:8, Jer 51:6,45, 2Kor 6:17 * **18:5:** Jen

18:20-21, Jer 51:9 * **18:6:** Sam 137:8, Jer 50:15,29, 2Tes 1:6

* **18:7:** Aes 47:7-9

8 *Præn naha ramærpwi atukw a in iamihni iræ ro pen nærpwiniien me sævænhni tuhæuvehe ia næpîn kuatia a:

nemhæien, nasækien, mine nukumhæ.

Napw trahi præ naha,

tî næri næ mæ Iærimænu Kumwesæn sæ rauvei pen nærpwiniien min niskaiien sævænhni rasori.”

9 *Næpîn kig me sævæi tîprænæ sëmæme hæno æpnæpen raka nari iræha præ naha nænæ mharæ iræha min ia naræien sæ rukuær ia narimnari amasan me tuhætoni nise napw sæ ramahi in, nænæ rerinraha træpou hasæk tukwe. 10 *Næmisæien sævænhni tro iræha hæhekîr, nænæ mhærer pen a isipwîn mæ,

“Aueh taon asori!

Aueh Pæpilon taon sæ nægsem rasori!

Nærpwiniien sæim ruvæuvehe ia aoa kuatia a.”

11 *Nærmama me ia tækure tîprænæ kãmhamri pen næmri nari ia narimnari tuhasæk tî præ naha tî næri næ mæ iærmama riti mwi riwæn truvehi næmri narimnari me sævænraha. 12 *Narimnari me sævænraha ræmwhen ia aean mi naha kol mine silva, mine kæpwier amasan me, mine perel me, mine tînari amasan naha linen, mine tînari sæ ro tîhi natis iræ, mine tînari naha silik, mine tînari sæ rærueræv pik, mine nei me sæpæmsæpæ nîpekînraha rapein amasan, mine narimnari me sæpæmsæpæ kîno ia kæn kæpati elefen, mine narimnari me sæpæmsæpæ kîno ia nei nænimen rutæ pik, mine aean me nepwîn ræmwhen ia prons, mine kæpwier

* 18:8: Jer 50:34, Rev 17:16

* 18:9: Rev 17:2, Esik 27:30-35

* 18:10: Esik 26:17, Dan 4:30

* 18:11: Esik 27:36 * 18:12:

Esik 27:12,13,22

amasan naha mapil, ¹³ mine teki nei sinamon,
 mine nimwai nari kavi rərəgi pen ia nəveginien,
 mine nimwəkmwəki nari kuvani nipekin rapein
 amasan, mine nise nei mi naha fragkinsens mine
 mir, mine waen, mine oel, mine flaoa, mine
 kwənuni wit, mine kau me mine sipsip me, mine
 hos me mine kat me hos me kamhəvi, mine slef
 me, slef me nə irəha nərmama.

¹⁴ “Narimnari amasan me pam səməme nətərigien
 səim ramevən ia nirəha,
 hənəpwəh ik mhəuvavən.

Nautə me pam səim mine marəmarə me pam səim
 ikinətə wau raka ia nirəha,
 nənə ko ipkətoni mhə mwi irəha ia nəpın riti.”

¹⁵ *Nərmama me naha səməme kamhəmri pen
 nəmri nari ia narimnari me naha həpeki nautə
 rıpik ruku pen ti prən naha. Irəha tuhəhekır
 nəmisəien səvəi prən naha, mhərer pen a isipwın
 tukwe in, mamhasək əpwəmwis ¹⁶ *mə,
 “Aueh! Aueh taon asori!

In rəmwhen ia pran ramarkahu ia tınari amasan i
 kani mə linen
 sə ro tihi natis irə raməruerəv pik.

In ramo pen marəmarə me ia nıpwran,
 marəmarə me nənimen rutə pik kino ia kol,
 mine kəpwier amasan me, mine perel me.

¹⁷⁻¹⁸ *Mətə kouraha pam nautə me səvənhi ia aoa
 kuatia a.”

Nənə nəmə səməme kamhəkəkini nıtətə ia
 təsi, mine nərmama səməme kamhərəku nıtətə
 mamhəputə, mine nəmə səməme kamhowok

* **18:15:** Esik 27:31,36 * **18:16:** Rev 17:4 * **18:17-18:** Esik
 27:27-29,32

ia nəkawai nītətə, mine nərmama səməme nītətə
rapeki narimnari səvənraha muvehe mipeki parei
kamhəmri pen nəmri nari ia nirəha, mamhəuvehi
mane irə, irəha pam hətoni nise napw sə ramahi
prən nəha, mhərer pen a isipwın tukwe in,
mamhasək əpwəmwis, mamhəni mə,

“Taon asori riti riwən rəmwhen ia taon nəha!”

19 *Irəha hərki pen nıməkwrur ia
kənkəpwənraha, rerinraha rəpou, kamhasək,
mamhəni mə,

“Aueh! Aueh taon asori!

Nərmama me pam səməme nītətə səvənraha ra-
maiu ia təsi,

irəha nautə səvənraha ruvehe masori ia
narimnari me səim!

Mətə kouraha pam narimnari me səim ia aoa kua-
tia a.”

20 *Mətə nīpu riti mwi rani iamınhi irə minuə,
“Kımiaha ia nītətə ia neiai, kımiaha nərmama me
səvəi Kumwesən, mine aposol me mine pro-
fet me,

rerimiaha traməkeikei magien,

tı nəri nə mə Kumwesən rinərpwın noien
ərəha prən nəha rino ia kımiaha!”

21 *Nənə agelo riti nəgsen rasori ruvehi
kəruətərei asori riti mərarki pen i ia nəkawai təsi
mını mə,

“Tukəraki irapw akwauakw taon asori nəha Papi-
lon iamınhi irə,
nənə tukəpwəh nətoniien mwi in ia nəpın riti.

* **18:19:** Esik 27:30-34 * **18:20:** Aes 44:23, Dut 32:43, Jer 51:48

* **18:21:** Jer 51:63-64, Esik 26:21

22 *Ia niram taon Papilon tipkregi mhə mwi nərmama səməme kamhəuəsi nəri kauəsi kaməni nīpu irə,
uə nərmama səməme kamhəse tərhe nau mine kisipw.

Ia niram tipkətoni mhə mwi iərmama sə ramarpəkau amasan narimnari me.

Tipkregi mhə mwi kəpwier ramərari maməkwaī ətestesi kwənuni wit kamo flaoa i.

23 *Nukuraanien səvəi laet tripkəhiapw mhə mwi ia niram,
nənə tipkregi mhə mwi reri iərman mine pran səməmi krauni simwīn ti narəien vi səvənrau.

Tro iamīnhi irə ti nəri nə mə fwe kupwən nərmama me səim səməme kamhəmri pen nəmri nari ia narimnari irəha kamhəuvehi nasorīien ia təkure tiprənə.

Nərmama ia tənəmtənə me pam hətoni nīmtətien me nəha ikino ia niskaiien səvəi iəremhə reikuə ia nīrəha.

24 *Ia taon nəha Papilon Kumwesən rətoni nite profet me mine nərmama me səvənhi.

Nərmama me pam ia təkure tiprənə səməme kīnousi əpune irəha Kumwesən rətoni nītenraha ia taon nəha.”

19

Nərmama fwe ia neiai həgnəgīni Kumwesən

* **18:22:** Aes 24:8, Esik 26:13 * **18:23:** Jer 7:34, 16:9, Jer 25:10,
Aes 47:9 * **18:24:** Jer 51:49, Mat 23:35, Rev 17:6

1 Kurirə ia narimnari me i iakregi reri nari riti rəmwhen ia nərmama həpik fwe ia neiai, kamhəgkiari rerinraha rupwinari mamhəni mə, “Pwəh səgnəgini Iərimənu Kumwesən səkitaha! In rauvehimiru kitaha. Nasorien mine niskaiien səvənhi əpa.

2 *Nəkiriien me səvənhi ho nipərhiien, mhatuk-watukw.

In rinərpwin raka noien ərəha səvəi taon asori nəha Pabilon,

ti nəri nə mə taon nəha rəmwhen ia pran səvəi suatuk

rouraha nərmama ia təkure tīprənə i ia noien ərəha səvənhi.

Kumwesən ruvəuvei pen raka nərpwinien min, ti nəri nə mə kousi əpune səvənhi iotukwini-nari me ia taon nəha.”

3 *Nənə irəha həgkiari asori mwi mə,

“Pwəh səgnəgini Iərimənu!

Nise napw sə ramahi taon nəha rautə ia nuk nuk me ko ripkiwən mhə.”

4 *Ia nəpin nəha nəmə asori me nəha twenti-fo mine nərimiru me nəha kefə hənimwi nukurhūn-raha ia nəmri Kumwesən sə raməkure ia jea səvənhi mamərimənu, mhəsiai in, mhəni mə, “Ouəh! Pwəh səgnəgini Iərimənu!”

5 *Nənə reri iərmama riti ruku pen ia jea Kumwesən raməkure irə mamərimənu, mini mə, “Kimiaha nərmama hiamə tukwini nari m Kumwesən, mamhəsiai in,

* 19:2: Rev 6:10, 16:7 * 19:3: Rev 14:11 * 19:4: Rev 4:2,10

* 19:5: Sam 22:23, Sam 134:1, Sam 135:1, Rev 11:18

nəri auər a mə hiaməuvehi nasoriien uə
 hiəpkuvehi mhə nasoriien,
 kīmiaha pam tihaməkeikei mhəgnəgini
 Kumwesən səkitaha!”

6 *Nənə iakregi nari riti rəmwhen ia nərmama
 həpik kamhəgkiari, rerinraha rəmwhen ia nui sə
 ramivə mamierig, mine karuəruə ramərkwəpahar.
 Irəha həni mə,

“Pwəh səgnəgini Iərimənu Kumwesən səkitaha
 ti nəri nə mə in rauvehi niskaiien me pam,
 mamərimənu!

7 Pwəh sagien, mhagien pik, mhəuvehi utə nəghin,
 ti nəri nə mə nəpīn ruvəuvehe tukiri pen vi a
 pran m kwəti sipsip!

Pran səvənhi rinəpnəpenə pam raka,

8 *mamarkahu ia tīnari amasan nəha linen
 kuvei pen min rəpsan məmher.”

(Tīnari amasan nəha linen ramahatən pen
 noien atukwatukw me səvəi nərmama me səvəi
 Kumwesən.)

9 *Nənə agelo nəha rini pehe tukw iou i mə,
 “Rai pen nəgkiariien i ia nəkukuə. ‘Nərmama
 səməme kīnəkwein ia nīrəha mīnuə tuhəuvən ia
 nəveginien asori səvəi kwəti sipsip irəha rerinraha
 tragien.’ ” Nənə agelo nəha rarə mīni mwi tukw iou
 i mə, “Nəgkiariien me i nəgkiariien pərhien səvəi
 Kumwesən.” 10 In rini iamīnhi irə, nənə iakinimwi
 nukurhuk mi ia nisun mə takisiai in, mətə in
 rini pehe tukw iou mə, “Tikəpwəh noien iamīnhi
 irə! Krau iotukwininari mi a, kitaha piam me
 səməme kamhəuvehi nəgkiariien i Iesu rini mə ro

* 19:6: Rev 11:15, 14:2, Rev 15:3, 21:2 * 19:8: Aes 61:10

* 19:9: Mat 22:2-3, Wok Me 10:25-26, Rev 22:8-9

nīpārhiēnien. Tikaməkeikei mīnīmwi nukurhum mī ia nəmri Kumwesən əpa, mīsiai in, tī nəri nə mə nəgkiariien i Iesu rīni mə ro nīpārhiēnien in nukune nəgkiariien me səvəi profet me.”

Iərmama sə raməkure ia hos əpsan

¹¹ *Nənə iakətoni kəsevər ia neiai. Iakəti pen mətōni hos əpsan riti. Iəmə sə raməkure irə nəghin nə “Iəmə sə Kamətīgite Irə. In rani nīpārhiēnien.” Nəpīn in rəkiri nərmama uə raruagən, mətə in ramo ia noien sə ratukwatukw a. ¹² *Nənimen mī krouəmwhen ia nərāmi napw. Ia təkure kənkəpwə kəfəfau səvəi nīsiaiien me həpīk. Kīrai pen nəhag riti irə, mətə iərmama riti rīpkukurən mhə nahag nəha, in əpa in rukurən. ¹³ *In ramarkahu ia tīnari riti kīneitesi ia netə. Nəghin sə kaməkwein in irə in nə “Nəgkiariien səvəi Kumwesən.” ¹⁴ Naruagən me ia neiai kamhəkure ia hos əpsan me mamhəkurirə in, mamharkahu ia tīnari amasan nəha linen rəpsan məmher. ¹⁵ *Iərmama nəha nau riti səvəi naruagənien rəhiə ruku pen ia nīpəgi nəkwan mamier. Ia nau nəha in truvehi irapw nīskaiien səvəi nərmama ia tənəmtənə me, nənə muvehi nəri skai riti sə rəmwhen ia nep ramahatən pen nasoriien səvəi kīg, rauvehi mamərimənu ia nīrəha. In tro rīskai anan ia nīrəha rəmwhen kamo ia tīpwei krep sə rīmarei nərmama kamheivə testesi mə nīsenraha trarīs. Noien nəha in nəha Kumwesən i rauvehi nīskaiien me pam truvehi irapw niemaha

* **19:11:** Rev 1:5, 6:2, Sam 96:13, Aes 11:4 * **19:12:** Rev 1:14,
2:17 * **19:13:** Aes 63:1-3, Jon 1:1,14 * **19:15:** Rev 1:16, 12:5,
Rev 14:20, 4:8, Rev 21:22

asori sǝvǝnhi irǝ. ¹⁶ *Kǝmǝrai pen nǝghǝn ia tinari sǝvǝnhi mǝne nuvan mǝ:

KIG Sǝ RASORI IA KIG ME. IǝRǝMǝNU Sǝ RASORI IA NǝRǝMǝNU ME.

¹⁷ *Nǝnǝ iakǝti pen mǝtoni agelo riti ramǝrer pen ia meri. In ramǝkwein ǝpwǝmwǝs mani pen ti menu me sǝmǝme kamhǝivǝ ia nimagouagou mǝ, “Hǝuvehe mhousǝsimwǝn kimiaha me ti nǝveginien asori sǝvǝi Kumwesǝn. ¹⁸ Hǝuvehe mhani nǝpwrai kig me, mǝne nǝmǝ asori me sǝvǝi naruagǝn me, mǝne nǝrmama nǝgsenraha rasori, mǝne hos me, mǝne nǝrmama sǝmǝme kamhǝkure ia hos me. Hǝuvehe mhani nǝpwrai nǝrmama me pam: irǝha sǝmǝme ko slef ia nirǝha mǝne sǝmǝme kipko mhǝ slef ia nirǝha, irǝha sǝmǝme kamhǝuvehi nasoriien mǝne sǝmǝme hǝpkuvehi mhǝ nasoriien.”

¹⁹ *Nǝnǝ iakǝtoni nǝrimǝru nǝha, mǝne kig me sǝvǝi tiprǝnǝ, mǝne naruagǝn me sǝvǝnraha housǝsimwǝn irǝha me mǝ tuharuagǝn irǝha Iǝmǝ sǝ ramǝkure ia hos mǝne naruagǝn me sǝvǝnhi. ²⁰ *Nǝnǝ naruagǝn me sǝvǝi Iǝmǝ nǝha hǝuvǝn mhǝkwtǝmhiri nǝrimǝru nǝha, mǝne profet eikuǝ nǝha sǝ rinamo nimtǝtien me fwe kupwǝn nǝpǝn rinamǝrer irau nǝrimǝru nǝha. (In rinamo nimtǝtien me nǝha, mǝmeikuǝ ia nǝrmama sǝmǝme kamhǝuvehi mak sǝvǝi nǝrimǝru nǝha, mǝne sǝmǝme kamhǝnimwi nukurhunraha ia nǝmri nǝri kuvrhǝkin kuvnhi nǝrimǝru irǝ mhǝsiai in.) Irǝha hǝkwtǝmhiri irau, mhǝrarki pen mǝru a irau ia kwopun ǝmwhenimw nǝha napw mǝne

* **19:16:** Rev 17:14 * **19:17:** Esik 39:17-20 * **19:19:** Sam 2:2

* **19:20:** Rev 13:12-17, Rev 20:10,15, Aes 30:33

təpisi ərəha krauuək ikin. ²¹ *Nənə kig me mine naruagən me səvənraha, İəmə sə raməkure ia hos rərai əpune irəha ia nau səvəi naruagənien sə ruku pen ia nıpəgi nəkwən mamier. Nənə menu me pam hani nıpwranraha tıpwınraha rəsisi amasan.

20

Nuk wan-taosən

¹ *Nənə iakətoni agelo riti rukrutə ia neiai mameiwaiu pehe, mauvehi ki riti ia rəgın, ki səvəi nıpəg sə rameiwaiu nukunen riwən. In rauvehi mwı jen asori riti. ² *In rəkwtəmhiri snek asori, snek sə rınarə raka tui nəghın nə İəremhə uə Setan. Agelo nəha rəkwtəmhiri, mərihi səvəi nuk wan-taosən, ³ *mərarki pen ia nıpəg sə rameiwaiu nukunen riwən, nənə məsisəg əknekın irə mınuə snek asori nəha trəpwəh mwı neikuəien ia nərmama ia tənəmtənə me meste nuk wan-taosən ro sampam. Nəpın nuk wan-taosən ro sampam, tukaməkeikei kifi nari irə səvəi nəpın ouihi a.

⁴ *Nənə iakətoni jea me nepwın səvəi nəmə asori me. Nəmə asori me səməme kamhəkure ia jea me nəha, kuvei pen nasoriien mınraha tuhaməkiri noien me mamhərpwın. Nənə iakətoni nənimwi nərmama səməme kınərai əmwesi kənkəpwənraha ti nəri nə mə irəha kamhərer irəpw ti nini irəpwien nəgkiariien amasan səvəi İesu mine nəgkiariien səvəi Kumwesən. Irəha həpwəh nənimwiien nukurhunraha ia nisaiien ia nəmri nərimıru uə ia nəmri nəri kuvrhəkın kuvnhi

* **19:21:** Rev 19:17-18 * **20:1:** Rev 9:1 * **20:2:** Rev 12:9
 * **20:3:** Jut 6 * **20:4:** Dan 7:9,22,27, 1Kor 6:2, Rev 13:17

nərimiru irə, mhəpwəh nuvehien mak səvənhi ia nīpwənanraha mine rəginraha. Iakətoni irəha həuvehe mhəmīru mwi, nənə mamhərimənu irəha Kristo meste nuk wan-taosən. ⁵ In i nəpīn sə Kumwesən rīməkupwən mo nərmama irə hətui mwi ia nemhəien. Mətə nərmama həuvamhə səməme in rīpko mhə irəha hətui mwi ia nəpīn nəha tuhəpkətui mhə mwi ia nemhəien meste nuk wan-taosən ro sampam. ⁶ *Nərmama me i səməme Kumwesən rīməkupwən mo irəha hətui mwi ia nemhəien, irəha rerinraha tragien, ti nəri nə mə irəha nəkur ikinan me səvənhi. Irəha tuhəpkemhə mhə mwi ia nemhəien sə ro kəru i, mətə irəha tuho pris me ia nirəha, pris me səvəi Kumwesən mine Kristo, nənə mhərimənu irəha min ia nuk wan-taosən.

Setan trevən ia napw

⁷ Nənə nəpīn nuk wan-taosən ro sampam, tukifi nari ia Setan rier irapw ia kwopun kīnəsisəg əknekīn in ikin. ⁸ *In trier irapw, mevən meikuə ia kwənəkwwus me nəha səməme kamharə ia nīkare təkure tīprənə i kefə, nəghinraha Kauk mine Makauk, nənə mousəsimwīn irəha mə tuharuagən. Nərmama me nəha tuhəpīk məmwhen ia nīpəkīr ia təsi. ⁹ *Iakətoni mə irəha həuvən ia kwopun me pam ia tīprənə, mhərer kuraukurau kwopun nərmama me səvəi Kumwesən kamharə ikin mine taon sə Kumwesən rokeikei pīk. Mətə napw riti rukrutə ia neiai meiwaiu pehe mahi irəha. ¹⁰ *Nənə kuvehi Setan, iəremhə sə rīneikuə

* **20:6:** Rev 1:6 * **20:8:** Esik 38:2,9, Esik 38:15-16 * **20:9:**

2King 1:10, Esik 39:6 * **20:10:** Jen 19:24, Sam 11:6, Rev 19:20, 21:8

ia nirəha, kuvehi, kərarki pen ia kwopun əmwhenimw nəha napw mine təpisi ərəha krauuək ikin. In nəha kwopun nəha kinərarki pen raka nərimiru ikin mine profet eikuə. Nənə tuko nəmisəien minrahar ia nəpın mine ia ran ia nuk nuk me.

Kumwesən rəkiri nərmama səməme həuvamhə, mərpwın noien me səvənraha

¹¹ Ia nəpın nəha iakətoni jea asori riti rəpsan mine İəmə sə raməkure irə mamərimənu. Tıprənə mine neiai krouap ti nənimen kıpəkətoni mhə mwi irau. ¹²*Nənə iakətoni nərmama həuvamhə səməme fwe kupwən kamhəuvehi nasorijen mine səməme həpkuvehi mhə nasorijen, irəha pam kamhərer ia nəmri İəmə sə raməkure ia jea səvənhi mamərimənu. Nənə krıpwegi nəkukuə me nepwın. Krıpwegi mwi nəkukuə riti mwi, nəkukuə səvəi nımıruien. Nənə İəmə nəha rəkiri nərmama həuvamhə mesi pen nəgkiariien kimərai pen ia nəkukuə me nəha, mərpwın atukwatukw noien me irəha həno fwe kupwən. ¹³*Təsi raraka ia nərmama həuvamhə səməme kamharə irə. Noien İərmama Remhə mine Imwei Nəkur Həuvamhə irau mwi krouaraka ia nərmama səməme kamharə ia nirau. Irəha pam hətui mwi ia nemhəien səvənraha, nənə İəmə nəha rəkiri irəha kuatia kuatia, mərpwın atukwatukw noien me irəha həno fwe kupwən. ¹⁴*Nənə kuvehi Noien İərmama Remhə mine Imwei Nəkur Həuvamhə kərarki pen irau ia kwopun əmwhenimw nəha

* **20:12:** Dan 7:9-10, Mat 25:31-46, Wok Me 17:31, 2Kor 5:10, Rev 13:8 * **20:13:** Rom 2:6, 1Pit 1:17, Rev 2:23, 22:12 * **20:14:** 1Kor 15:26,55

napw rauæk ikin. Næri naha in naha nemhæien sæ ro kæru i. ¹⁵*Nærmama me pam sæmæme kipkætoni mhæ næghinraha ia nækukuæ sævæi nimiruien kærarki pen iræha ia kwopun æmwhenimw naha napw rauæk ikin.

21

Jerusalem vi

¹*Nænæ iakætoni neiai vi mine tiprænæ vi, ti næri næ mæ neiai akuas mine tiprænæ akuas krouvehe rouiwæn. Nænæ tæsi riwæn mwi. ²*Nænæ iakætoni taon ikinan sævæi Kumwesæn, in næ Jerusalem vi, rukrutæ ti Kumwesæn ia neiai mameiwaiu pehe. Taon ikinan naha ramser ræmwhen ia tinari sæ pran rarkahu iræ ia næpin tukiri pen vi a in kuvei pen m iærman sævænhi. ³*Nænæ iakregi reri iærmama riti rupwinari ruku pen ia jea sæ Kumwesæn ramækure iræ mamærimænu, rini mæ, “Hætæ ro! Tækwtækwuni naha Kumwesæn rino rukwænu sævænhi iræha nærmama. In tramaræ iræha minraha, nænæ iræha tuhæuvehe nærmama me sævænhi. Kumwesæn in tramaræ ti niræha, nænæ muvehe Kumwesæn sævænraha. ⁴*In trirai raka pam nise nænimenraha. Noien iærmama remhæ mine nasækien mine næmisæien triwæn, ti næri næ mæ narimnari tui me hæuvehe mhæuvæiwæn.”

⁵*Nænæ Iæmæ sæ ramækure ia jea mamærimænu rini mæ, “Hætæ ro! Iakamo narimnari me pam hæuvehe mhærmævi.” Nænæ in raræ mini mwi

* **20:15:** Rev 13:8, 19:20 * **21:1:** 2Tes 3:13 * **21:2:** Aes 52:1, 61:10, Hip 11:16, 12:22, Rev 3:12 * **21:3:** 2Kron 6:18, Sek 2:10, 2Kor 6:16, Rev 7:17 * **21:4:** Aes 35:10, Aes 65:19 * **21:5:** 2Kor 5:17, Rev 4:2,10

mə, “Rai pen nəgkiariien i ia nəkukuə, ti nəri nə mə nəgkiariien me i ho nɪpərhiienien nərmama həukurən nətigiteien ia nɪrəha.”

6 *Nənə in rərari mɪni pehe tukw iou i mə, “Təkwtəkwiuni nəha kɪno sampam ia narimnari me pam! Iou i Alfa mɪne Omeka,^a nukunen mɪne nəkrəkwerɪn. Nərmama səməme həkwakwa iou takuvei pen nui mɪnraha. Nui nəha kɪpkuvehi mhə nənimen. Nəmri nui nəha rauvei pehe nui kauvehi nɪmɪruien irə. 7 *Iərmama sə triskai meste naruaɡəniien rukurau, iou takuvei pen narimnari me səməme iakuvəni pen raka tukwe in. Iou takuvehe Kumwesən səvənhi, nənə in truvehe nərik. 8 *Mətə nərmama səməme kamhəhekɪr ia nərmama, mhəpwəh nahatətəien, mamho noien əmkemɪk, mamhousi əpune nərmama, mamhakres pran, mamho klepa, mamhəuvehi nahak, mamhəfwaki m nənimwi nari me, mɪne iekuə me pam, imwənraha atukwatukw fwe ia kwopun əmwhenɪmw nəha napw mɪne təpisi ərəha krauuək ikɪn. Nəri nəha in nemhəien sə ro kəru irə.”

9 *Nənə nagelo me nəha sefen kamhəpeki pesɪn me nəha sefen həukuər ia nərpwɪniien irəha sefen (nənə nərpwɪniien me nəha irəha nərpwɪniien sampam Kumwesən tro m nərmama), riti ia nagelo me nəha rɪni pehe tukw iou i mə, “Uvehe

* **21:6:** Sam 36:9, Jer 2:13, Jon 7:37, Rev 1:8,17, 22:17 **a 21:6:** Alfa in leta sə rukupwən ia alfapet səvəi nəkur Kris. Omeka in leta sampam. Nəhag i kaməkwein Kumwesən irə nɪpwran mə in nukunen mɪne nəkrəkwerɪn. Əvsini mwɪ Rev 21:6; 22:13. * **21:7:**

2Saml 7:14 * **21:8:** Mat 25:41, Hip 10:38-39, Rev 19:20, 21:27, 22:15 * **21:9:** Rev 15:1

ro. Iakuə takahatən prən nəha, in pran səvəi kwəti sipsip, pwəh ikətoni.” ¹⁰ *Nənə ia vison nəha Nənimwīn rəriari miou iakətoni agelo nəha ruvehi iou iarouevən fwe ia təkuear riti rasori məpwəmwis. Nənə in rahatən taon ikinan nəha Jerusalem iakətoni ruku pen ti Kumwesən ia neiai mameiwaiu pehe. ¹¹ *Taon ikinan nəha ruku-raan ia nukuraanien səvəi Kumwesən. Ramserser rəmwhen ia kəpwier amasan riti kani mə tiaspa rəmher rəmwhen ia klas. ¹² *Nəpai riti rasori məpwəmwis rukuraukurau irə. Ia nəpai nəha kwəruə me irəha twelef. Nagelo me twelef kamhərer ia kwəruə me nəha. Ia kwəruə me nəha kimərai pen nəghi kwənəkwus me səvəi nəkur Isrel irəha twelef. ¹³ Kwəruə me nəha kahar ia nīkare taon nəha peraha, kahar mwi ia nīkaren prehi, kahar ia nīkaren pesu, nənə kahar ia nīkaren parei. ¹⁴ Kəpwier asori me irəha twelef kamhəkwtəmhiri əknekīn nukune nəpai nəha səvəi taon nəha. Nənə kimərai pen nəghi aposol me twelef səvəi kwəti sipsip ia kəpwier me nəha.

¹⁵ *Agelo sə raməgkiari miou rauvehi nari riti kīno ia kol truvehi mak səvəi taon irə mine nəpai səvənhi mine kwəruə me ia nəpai nəha. ¹⁶ Nīkare taon nəha irəha kefə. Nasoriien səvəi nīkarkaren me mine nəpwəmwisien səvənraha rutə həmnəmwhen a. Agelo nəha ruvehi nəri nəha rauvehi ia rəgin, muvehi mak səvəi nīkarkaren me, mətoni irəha kuation kuation nasoriien səvənhi mine nəpwəmwisien səvənhi rutə tu-taosen-fohantret kilometa. ¹⁷ In ruvehi mwi nīkimkimien

* **21:10:** Esik 40:2, Rev 21:2 * **21:11:** Aes 60:1-2,19 * **21:12:**

Esik 48:30-35 * **21:15:** Rev 11:1

səvəi nəpai nəha mətoni rəmwhen ia sikisti-sikis mita. Mita nəha sə agelo nəha rauvehi mak səvəi nari irə rəmwhen a mwi ia mita nəha nərmama kamhəuvehi mak səvəi nari irə. ¹⁸ Nəpai nəha kīno ia kəpwier amasan i tiaspa, nənə kuvrhəkin taon ia kol atukwatukw, kol sə rəmher məmwhen ia klas. ¹⁹ *Kəpwier asori me səməme kamhəkwtəmhiri əknekīn nukune nəpai səvəi taon nəha kəfəri pen irəha ia kəpwier amasan me səpəmsəpə. Kīməkupwən kəmri pen kəpwier amasan i tiaspa, sə ro kəru irə kəmri pen kəpwier amasan i safaiia, sə ro kahar irə kəmri pen kəpwier amasan i akat, sə ro kefə irə kəmri pen kəpwier amasan i emeral, ²⁰ sə ro krirum irə kəmri pen kəpwier amasan i onikis, sə ro sikis irə kəmri pen kəpwier amasan i kanilian, sə ro sefen irə kəmri pen kəpwier amasan i krisolaet, sə ro eit irə kəmri pen kəpwier amasan i malakait, sə ro naen irə kəmri pen kəpwier amasan i topas, sə ro ten irə kəmri pen kəpwier amasan i kalsetoni, sə ro eleven irə kəmri pen kəpwier amasan i takwoes, nənə sə ro twelef irə kəmri pen kəpwier amasan i ametis. ²¹ Kwəruə me nəha twelef təpinhə me səvənraha kīno ia perel irəha twelef. Təpinhə kwatia kwatia ko ia perel kwatia kwatia. Nənə suatuk me fwe imwə ia taon nəha kīno ia kol atukwatukw, kol sə rəmher məmwhen ia klas.

²² *Nənə iapkətoni mhə nimwə riti kaməfwaki ikin ia nəkwai taon nəha, ti nəri nə mə nimwəfwaki səvənhi in nə lərimənu Kumwesən sə rauvehi niskaiien me pam mine kwəti sipsip. ²³ *Ia taon

* **21:19:** Aes 54:11-12 * **21:22:** Rev 15:3 * **21:23:** Aes 60:19-20, Rev 22:5

nəha irəha tuhəpkətui mhə mwi meri mine məkwə mə trouəhiəpwīn irəha ti nəri nə mə nukuraanien səvəi Kumwesən raməhiəpwīn pam taon nəha, nənə kwəti sipsip in nə laet səvənhi. ²⁴ *Nərmama ia tənəmtənə me tuhavən ia nukuraanien səvənhi, nənə kig me ia təkure tīprənə tuhəpeki nautə amasan me səvənraha mhəuvnimwə ia taon nəha. ²⁵ *Kwəruə me səvəi taon nəha tukəpwəh nərəpīnhəien irəha ia nəpīn riti, ti nəri nə mə nəpīn ia nəpīn triwən ia kwopun nəha. ²⁶ *Nərmama ia tənəmtənə me tuhəpeki nautə amasan me səvənraha mine narimnari me nərmama həməuvei pen minraha ia nisaiien, nənə mhəpeki mhəuvnimwə ia taon nəha. ²⁷ *Narimnari me səməme həmkemik ia nəmri Kumwesən, mine nərmama səməme kamho narimnari səvəi naurisien, mine nərmama səməme kamheikuə, irəha tuhəpwəh nuvnimwəien ia taon nəha ia nəpīn riti. Mətə nərmama me a i səməme kimərai pen nəghīnraha ia nəkukuə səvəi nimiruien sə kwəti sipsip rauvehi irəha əpa nəha tuhəuvnimwə ia taon nəha.

22

Nui aris kauvehi nimiruien irə

¹ *Nənə agelo rarə mahatən mwi nui aris riti iakətoni. Nui ia nui aris nəha nui kauvehi nimiruien irə. Nui nəha rəmher rəmwhen ia klas, raiu maku pen fwe ia jea sə Kumwesən mine kwəti sipsip krauəkure irə rouərimənu,

* **21:24:** Aes 60:3,5 * **21:25:** Aes 60:11 * **21:26:** Sek 14:7,
 Rev 22:5 * **21:27:** Aes 52:1, 1Kor 6:9-10, Rev 13:8, 21:8 * **22:1:**
 Esik 47:1

2* mamesi pen suatuk ia kurkwai taon naha. Nənə iakətoni nei kauvehi nimiruien irə ramərer ia nīkarkare nui naha, maukuə m twelef ia nuk me pam ia məkwə me pam. Nənə nərmama ia tənəmtənə me pam kamhətimwi nīmwan ti nomasanien nēmhəien me. 3 Ia nəkwai taon naha tukəpwəh mwi nətoniien nari riti sə Kumwesən raməkwein ərəha irə. Jea sə Kumwesən mine kwəti sipsip krauəkure irə rouərimənu trərer ikin. Nənə iotukwininari me səvənhi tuhamo nəkwən. 4* Irəha tuhətoni nənimen, nənə tukrai pen nəghin ia nīpwənanraha. 5* Nəpīn ia nəpīn triwən. Irəha tuhəpkətui mhə meri uə nari riti mwi truvei pen nukuraanien mīnraha, ti nəri nə mə lərimənu Kumwesən səvənraha in trukuraan muvei pen nukuraanien mīnraha, nənə irəha tuhərimənu ia nuk nuk me. 6* Nənə agelo naha rini pehe tukw iou i mə, “Nəgkiariien me i ho nīpərhienien nərmama həukurən nətigiteien ia nīrəha. lərimənu Kumwesən səvəi nənimwi profet kupwən me rīnərhi pehe iou agelo səvənhi mə takuvehe mahatən narimnari me tripkə mhə tui həier pehe pwəh səvənhi iotukwininari me hətoni.”

Tripkə mhə tui Iesu ruvehe

7* “Həregi ro! Tripkə mhə tui iakuvehe. lərmama sə ramo nəgkiariien me səməme Kumwesən ruvei pehe, kamhəmak ia nəkukuə i, in rerin tragien.”

* 22:2: Joel 3:18, Sek 14:8, Jen 2:9, Esik 47:12, Rev 22:14,19

* 22:4: Sam 42:2, Mat 5:8, Rev 3:12 * 22:5: Dan 7:18,27, Rev 5:10, 20:6, Rev 21:23,25 * 22:6: Rev 1:1 * 22:7: Rev 1:3, 2:16

8 *Iou Jon, iou iakimæregi mætoni narimnari me i. Næpin iakregi mætoni raka narimnari me i, nænə iakinimwi nukurhuk mi ia næmri agelo sə rahatən iou irə mə takisiai in. 9 Mətə in rini pehe tukw iou i mə, “Əpwəh noien iaminha irə! Krau iotukwininari mi a səvəi Kumwesən kitaha piam me i profet me mine nærmama me sëməme kamho nægkiariien me ia nəkukuə i. Nimwi nukurhum mi ia næmri Kumwesən, misiai in!”

10 *Nænə in rarə mini mwi tukw iou i mə, “Tikəpwəh nærkwafəien ia nægkiariien me i Kumwesən ruvei pehe mik kamhəmak ia nəkukuə i ti næri nə mə narimnari me i tripkə mhə tui həier pehe. 11 *Nærmama sëməme kamho noien ərəha pwəh kamhəmwur pen ia noien ərəha. Nærmama sëməme kamho noien əmkemik pwəh kamhəmwur pen ia noien əmkemik. Nærmama sëməme kamho noien atukwatukw pwəh kamhəmwur pen ia noien atukwatukw. Nærmama sëməme kamho noien əmher pwəh kamhəmwur pen ia noien əmher.

12 *Hæregi ro! Tripkə mhə tui iakuvehe! Takuvehi nærəkuien səiou, muvehe, muvei pen m nærmama me pam resi pen narimnari me irəha həno. 13 *Iou i Alfa mine Omeka,^a nukunen mine nəkrəkwerin. Iakinarə raka kupwən, nænə takarə mwi kurirə.

* 22:8: Rev 19:10 * 22:10: Rev 1:3, 10:4 * 22:11: Dan 12:10

* 22:12: Aes 40:10, 2Kor 11:15, Rev 2:16,23 * 22:13: Rev 1:8,17, 21:6 ^a 22:13: Alfa in leta sə rukupwən ia alfapet səvəi nəkur Kris. Omeka in leta sampam. Nahag i kaməkwein Kumwesən irə nipwran mə in nukunen mine nəkrəkwerin. Əvsini mwi Rev 21:6; 22:13.

14 *Nərmama səməme haikuas tinari səvənraha rəpsan, irəha rerinraha tragien. Takəsəni irəha hani nukwai nei kauvehi nimiruien irə, nənə mhəukurau ia kwəruə me səvəi taon nəha mhəuvnimwə. 15 *Mətə nərmama nepwin nəha ikin ko həpkuvnimwə mhə. Irəha nəha nərmama səməme həkemik rəmwhen ia kuri me, mamho klepa, mamho nahak. Nərman mine nīpran səməme kamhəiri əpnəpen irəha me irəha nəha ko həpkuvnimwə mhə. Nərmama me pam səməme kamhousi əpune nərmama, mamhəfwaki m nənimwi nari me, mamhokeikei pik noien səvəi neikuəien tuharə fwe iruə.

16 *Iou, Iesu, iakinərhi pehe agelo səiou mə truvehe mīni irapw narimnari me i tukumiaha nakalasia me. Iou i kig sə iakiməuku pen ia kwənəkwas səvəi Kig Tevit. Iou iakəmwhen ia kəməhau kofətəteia sə rukuraan.”

17 *Nənimwin Ikinan mine pran səvəi kwəti sipsip krauni mə, “Uvehe!” Nənə pwəh iərmama sə ramregi nəgkiariien i, in mwi rini mə, “Uvehe!” Nənə pwəh iərmama sə rəkwa kwa ruvehe. Iərmama sə rokeikei pwəh in rənimwi auər a nui sə kauvehi nimiruien irə.

18 *Iou, Jon, iakaməgkiari skai m nərmama səməme kamhəregi nəgkiariien me Kumwesən ruvei pehe miou kamhəmak ia nəkukuə i. Trini mīnuə iərmama riti rakutan pen atukw nəgkiariien riti səvənhi ia nəgkiariien me i, Kumwesən truvei pen min nərpwinien

* 22:14: Rev 22:2 * 22:15: Rev 21:17 * 22:16: Nam 24:17, Rom 1:3, Rev 2:28, 5:5 * 22:17: Sing 8:14, Rev 21:6 * 22:18: Dut 4:2, 12:32, Rev 15:1,6

me i nəkukuə i raməgkiari irə makutan pen mwi. ¹⁹ *Trini minuə iərmama riti ripekti raka nəgkiariien me nepwɪn ia nəkukuə i, Kumwesən tripekti raka namasanien me i nəkukuə i raməgkiari irə iərmama nəha tripkuvehi mhə riti. Namasanien me nəha nukwai nei kauvehi nimiruien irə mine kwopun riti ia taon ikinan nəha.

²⁰ *Iərmama sə rani irapw narimnari me i rini mə, “Pərhien tripkə mhə tui iakuvehe!”

Ouəh, pwəh ro iamɪnhi! Uvehe rə Iərimənu Iesu!

²¹ Pwəh namasanien səvəi Iərimənu səkitaha Iesu tramarə ti nərmama me pam. Ouəh, pwəh ro iamɪnhi!

* **22:19:** Rev 22:2 * **22:20:** Rev 2:16

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416